

尚

書

故

尚書故目次

桐城吳先生全書第二種

堯典 皋陶謨

禹貢

甘誓

以上第一冊

湯誓

盤庚

高宗彤日

西伯戡黎

微子

牧誓

洪範

金

滕

大誥

康誥

酒誥

梓材

召誥

洛誥

以上第二冊

冊

多士

無逸

君奭

多方

立政

顧命

康誥

費誓

呂刑

文侯之命

秦誓

書序

尚書五十

八篇目

附錄夏小正私箋

以上第三冊

光緒甲辰冬十二月門人王恩紱恩績等集貲刊行男闈生謹編次

堯典

蔡邕典引注典常也法也尙書疏堯之

典

曰若稽古 蔡傳曰越粵通曰若者發語詞周書越若

來三月亦此例也 段玉裁云曰若稽古四字為句

周書武穆篇曰若稽古曰昭天之道 汝綸案曰若

稽古者簡策發端之詞褚少孫說漢封齊王策云稽

者當也是稽古為當古當古猶言在昔也夏史追紀

虞書故言在昔也此經自漢經師已失其讀桓譚新

論稱秦延君說此四字三萬餘言然文辭之士能通其義王延壽魯靈光賦云粵若稽古帝漢祖宗濬哲欽明蔡邕東巡頌曰若稽古在漢迪哲皆法此經為文也

帝堯曰放勳 史記帝堯者放勳 馬云放勳堯名惠棟云勳古文勳見說文

欽明文思安安 尚書考靈耀思作塞安作晏 馬云威儀悉備謂之欽照臨四方謂之明經緯天地謂之文道德純備謂之思 鄭注考靈耀云寬容覆載謂

之晏 惠棟云春秋安孺子古今人表作晏孺子是
安與晏通 汝綸案欽聰聲近通借欽明書序作聰
明子雲美新云欽明尙古亦以欽為聰也

允恭克讓 漢書讓作攘 汝綸案王氏釋詞允猶用
也允克皆語詞也克攘者起下禪舜事也班固典引
云受克讓之歸運

光被四表格於上下 漢書光作橫說文格作假云至
也 舊傳光充也 戴震云爾雅枕充也孫炎枕作
光鄭禮注橫充也橫枕同 汝綸案禹貢舊傳被及

也廣雅方表也四表猶四方也爾雅格至也劉瓛易注至極也格于上下極于天地也

克明俊德 史記能明馴德徐廣曰馴古訓字 臧琳

云爾雅克能也俊馴聲相近 汝綸案訓德即順德

易君子以順德詩應侯順德立政用丕順德皆此馴德也其義當從俊夏小正傳俊大也大學作峻義同以親九族九族既睦 五經異義云尙書歐陽說九族乃異姓有屬者父族四五屬之內為一族父女昆弟適人者與其子為一族已女昆弟適人者與其子為

一族己之女子子適人者與其子為一族母族三母
之父姓為一族母之母姓為一族母女昆弟適人者
與其子為一族妻族二妻之父姓為一族妻之母姓
為一族 鄭云親睦也 汝綸案已之女子子似不
屬之父族疑父之母姓為一族也此二句相屬言睦
九族而九族睦也下并同既盡也

平章百姓 史記便章百姓 大傳作辨章鄭云辨別
也章明也舊傳百姓百官 段玉裁云古平便辨辯
四字通用 汝綸案廣雅辨徧也平便皆假音字辨

章者徧明也典引惇睦辨章之化治用此文也史記與尚書字異者歸熙父云或史公所見別本不同或古今文字異或改用訓詁字亦有全句改者讀之當有辨漢書言史公從孔安國問故所載多古文說段玉裁乃云文字仍依今文陳壽祺又云今文中有古文譏段氏以方為古文旁為今文與儀禮不合此皆強生分別今文亾久矣古書多異字鄭君所云一經之學數家競爽不專是今古文異也且如漢書所載史記之文亦多異同豈史漢亦有今古文邪今采錄

異文更不强分今古

協和萬邦 史記合和萬國 舊傳協合 臧琳云漢碑及石經邦國字互見宋洪适謂所傳本異非由避諱

黎民於變時雍 漢書變作蕃孔宙碑作卞 錢大昕云卞變蕃皆同音 汝綸案卞即弁字蕃變皆弁之假音詩傳弁樂也於弁者於樂也詩於樂辟雍與此於卞正同柯鳳孫劭忒云弁本作昇說文昇喜樂兒大玄測序石穀時雍范望注時調也雍和也漢書功

臣表昔唐以萬國致時雍之政用此文也於變時雍者於樂調和也

乃命羲和 史記厯書云黃帝考定星厯建立五行起

消息正閏餘於是有天地神祇物類之官是謂五官

少皞氏之衰也九黎亂德民神雜擾禍菑薦至莫盡

其氣顓頊受之乃命南正重司天以屬神命火正黎

司地以屬民使復舊常無相侵瀆其後三苗服九黎

之德故二官咸廢所職而閏餘乖次孟陬殄滅攝提

無紀厯數失序堯復遂重黎之後不忘舊者使復興

之而立義和之官明時正度則陰陽調風雨節茂氣
至民無天疫孔䟽法言云羲近重和近黎

欽若昊天 史記敬順昊天 臧琳云爾雅欽敬也若
順也

厯象日月星辰 史記數法日月星辰 江聲云厯讀
厯日月而迎送之之厯象讀聖人象之之象 汝綸
案爾雅厯數也漢書司馬相如傳張晏注厯猶算也
老子善數不用籌策數亦算也

敬授人時 史記敬授民時 臧琳云兩漢人所引多

作民時 沈彤云古人謂厯曰為時孔子謂行夏之時是也

分命羲仲 汝綸案說文分別也仲叔者官之副也猶孟侯之孟非謂昆季

宅嵎夷 史記居郁夷釋文云史記作禺鋤說文作嵎夷鄭周禮注宅作度 臧琳云五帝紀作郁夷夏本紀作嵎夷與陸所言不合 爾雅宅居也 孫星衍云方言度居也 汝綸案古宅度同字居度同義居郁夷謂度之也呂荆何度非及史記作何居非其宜

詩爰究爰度傳度居也其義皆為圖度也

曰暘谷 史記曰湯谷 臧琳云淮南子曰日出湯谷
寅賓出日 史記敬道日出釋文賓徐音儼史記正義
道音導鄭云春分朝日 江聲云釋詁寅敬也說文
儼導也

平秩東作 史記便程東作大傳作辯秩說文作平𣎵
馬本平作萃云使也 臧琳云程秩聲相近 段
玉裁云古者平辨皆訓使集韻拼抨併迸平萃六字
同 汝綸案作為成易自王莽以來皆以農事言之

據大傳西成伏物皆順時之政令春夏亦當同之不得專言農事也東都賦懼其侈心之將萌而怠于東作亦以政令為言時庸勸云程當作秬太室石闕銘室作室可證柯劭忞云程秬聲不近臧說誤一切經音義秬古文秬

日中星鳥以殷仲春 史記以殷中春 尚書考靈耀云主春者張昏中可以種稷主夏者火昏中可以種黍菽主秋者虛昏中可以種麥主冬者昴昏中可以收歛天子視四星之中知民緩急故云敬授民時也

馬云日中宵中日見之漏與不見者齊也 鄭云星
鳥鶉火之方舉仲月以統一時 汝綸案下殷仲
秋史記殷作正廣雅殷正也

厥民析 史記其民析 臧琳云爾雅厥其也 汝綸

案晁錯疏云揚弩之地少陰多陽其人䟽理厥民析
者即其人䟽理也此經兼言四時四方故晁據之以
言揚弩胡貉大傳陽伯之樂名曰皙陽是東巡所貢
樂鄭引此經讀皙為析此兼言四方之證素問四氣
調神篇春三月是謂發陳被髮緩形以使志生亦此

經之析也

鳥獸萐尾

史記鳥獸字微

說文字乳也尾微也惠

棟云字與萐通微與尾通

汝綸案微讀曰尾史記

集解引說文云尾交接也

申命羲叔宅南交

史記居南交

司馬貞云南交交

趾孫星衍云墨子大戴皆言堯南撫交趾

汝綸案

爾雅申重也廣雅重再也

平秩南訛

史記便程南為漢書作偽司馬貞云為字

依字讀孔安國強讀為訛錢大昕云古書偽與為通

敬致 江聲云馮相氏冬夏致日此獨於夏言之舉一隅也致日立表視景也

日永星火以正仲夏 馬云日長晝漏六十刻 鄭云五十五刻星火大火之屬

厥民因 史記其民因 汝綸案因讀如嬰史記齊威王名因齊國策作嬰齊是因嬰通借嬰言肌理如嬰兒之柔也視䟽理為益外泄矣素問四氣調神篇使華英成秀使氣得泄若所愛在外華英成秀所愛在外是因義也因又為重為仍月令繼長增高亦因也

鳥獸希革 汝綸案晁錯䟽言揚粵之地鳥獸希毛其性能暑希革即希毛也詩如鳥斯革傳革翼也是革為毛羽之證通作鞞

分命和仲 史記申命和仲 汝綸案史記作申是也 羲仲言分命者蒙上命羲和為文言別命其副云爾 此下皆言申命者蒙上分命為文猶言又命某又命某也和仲作分非其義矣

宅西 史記居西土徐廣曰一無土字

曰昧谷 史記曰柳谷 虞翻奏鄭解尚書違失云大

篆𠄎字讀當為柳古柳𠄎同字而以為昧 汝綸案
據虞此言經本作𠄎而鄭定讀為昧也近人謂鄭用
賈逵本若果賈本讀昧仲翔豈以譏鄭乎大傳秋祀
柳穀華山惠定宇云穀谷同字

寅餞納日 史記敬道日入 賈昌朝羣經音辨作寅
淺內日 鄭云秋分夕日 汝綸案鄭士虞禮注古
文餞為踐作淺者假借字餞訓為道者導送之

平秩西成 史記便程西成 大傳天子以秋命三公
將率選士厲兵以征不義決獄訟斷刑罰趣收歛以

順天道以佐秋殺 汝綸案大傳此經及下伏物皆
言政令則東作南為亦皆生養之政不專言農事也
宵中星虛以殷仲秋 史記夜中星虛以正中秋 鄭
云予武中虛宿也 臧琳云爾雅宵夜也

厥民夷 史記其民夷易 孫星衍云釋詁夷易也

汝綸案史以夷易釋夷者司馬相如封禪文軌迹夷
易李善注夷易皆平也素問秋三月此謂容平又云
收斂神氣使秋氣平是此文所云夷易也

鳥獸毛毼 說文周禮注毼皆作毼說文云仲秋鳥獸

毛盛可選取以為器用讀若選鄭云毯理也毛更生
整理

宅朔方 史記居北方 臧琳云詩傳朔方北方也

曰幽都 司馬貞云山海經北海之內有山名幽都蓋
是也

平在朔易 史記便在伏物 大傳天子以三冬命三
公謹蓋藏閔門閭固封境入山澤田獵以順天道以
佐冬固藏也 司馬貞云人畜積聚冬皆藏伏尸子
曰北方者伏方也 孫星衍云釋詁在察也 汝綸案

方言易始也爾雅舍人注朔盡也是朔易為終則又
始之義也王莽傳予之北巡以勸蓋藏蓋藏即伏物也
日短星昴以正仲冬 馬云日短晝漏四十刻 鄭云
四十五刻昴白虎中宿也 孔疏融據日出見為說
天之晝夜以日出入為分人之晝夜以昏明為限日
未出前一刻半為明日入後一刻半為昏損夜五刻
以裨於晝則晝多於夜復校五刻古今麻術與大史
所候皆云夏至之晝六十五刻夜三十五刻冬至之
晝四十五刻夜五十五刻春分秋分之晝五十五刻

夜四十五刻此其不易之法也然今太史細候之法則校常法半刻也從春分至夏至晝漸長增九刻半夏至至於秋分所減亦如之從秋分至於冬至晝漸短減十刻半從冬至至於春分亦如之又於每氣之間增減刻數有多有少不可通而為率漢初未能審知率九日增減一刻和帝時待詔霍融始請改之鄭注書緯考靈曜仍云九日增減一刻猶尚未覺誤也鄭注此云日長者日見之漏五十五刻日短者日見之漏四十五刻與厯不同故王肅難云知日見之漏

減晝漏五刻不意馬融為傳已減之矣因馬融所減而又減之故日長為五十五刻因以冬至反之取其夏至夜刻以為冬至晝短此其所以誤耳 柯劭忒

云日未出前二刻半日入後二刻半凡五刻將此五刻裨於晝故晝長本六十刻增為六十五刻晝短本四十刻增為四十五刻王肅謂鄭知日見漏比晝漏宜差五刻不知融云六十刻已減六十五刻為六十刻也因融所減而又減之者謂減六十刻為五十五刻也因以冬至反之者謂鄭以夏至之夜刻為冬至

之晝刻故注晝短云四十五刻也鄭之誤在減日永
晝漏六十刻為五十五刻 汝綸案王譏鄭取夏至夜
刻以為冬至晝短蓋如前太史云細候之法從春分
至夏至晝漸長增九刻半從秋分至冬至晝漸短減
十刻半之說鄭以夏至夜刻為冬至晝刻亦一誤也
厥民燠 史記其民燠 汝綸案晁錯云胡貉之地積
陰之處其人必理燠即晁所云必理也說文燠熱在
中也理必故熱在中字通作輿說文輿宛也燠者假
音字素問使志若伏若匿若有私意若已有得去寒

就溫無泄皮膚使氣亟奪是此經腴義也

鳥獸毳毛

說文毳作廢徐廣云毳音茸

馬云毳溫

柔兒

舊傳鳥獸皆生與毳細毛以自溫

汝綸案

晁錯云胡貉之地鳥獸毳毛其性能寒毳毛即毳毛也說文毳獸細毛也

帝曰咨汝羲暨和

史記無此句

汝綸案此於敘事

中記其命辭史公刪之取便文也皋謨中亦多此類

基三百有六旬有六日

史記歲三百六十六日

說

文基作棋

孔疏基匝也周天三百六十五度四分

度之一而日行一度則一基三百六十五日四分
日之一今考靈曜乾鑿度諸緯皆然此言三百六十
六日者王肅云四分日之一又入六日之內舉全數
以言之也漢存六厯諸緯與周髀皆云日行一度月
行十三度十九分度之七為每月二十九日過半十
二月六日之外餘小月無六日又大歲三百六十六
日小歲三百五十五日則一歲所餘正十一日弱也
未滿三歲是得一月則置閏也蘇軾云有讀曰又
以閏月定四時史記以閏月正四時孫星衍云孫

炎爾雅注定正也

成歲 汝綸案史於三百六十六日上著歲字故無此二字

允釐百工庶績咸熙 史記信飭百官衆功皆興 臧

琳云爾雅允信也工官也庶衆也績功也咸皆也熙興也 孫星衍云詩傳釐理也鄭易注飭理也是釐飭同義 汝綸案楊雄美新云庶績咸喜李善注喜與熙古字通禮疏引爾雅喜興也王引之謂允語詞史公訓信為失其實非也信亦語詞經傳中誕亮恂

展訓信者皆語詞也信飭猶乃飭也論語之言信如
猶詩之言乃如也允亦乃也允文允武猶乃文乃武
也此二句夏史之文不蒙上也下言順此事者指此
帝曰疇咨若時登庸 史記堯曰誰可順此事 說文
疇作鬻崔篆作訓 汝綸案爾雅疇誰也若順也時
是也登成也周禮注庸功也詩傳功事也登庸者成
事也百官既飭衆功既興故謂之成事而史但釋之
為事也云順此事者說文順理也此經兩言疇咨史
皆釋為誰可是咨為語詞也魏脩孔廟碑咨可謂命

世大聖以咨為茲疇咨猶休茲徂茲咨茲皆訓哉疇
咨者誰哉也

胤子朱啓明 史記嗣子丹朱開明 說文朱作絳
馬云胤嗣也 舊傳啓開也 汝綸案此蓋求人禪
位一再咨度故舉嗣子不用乃更舉共工也孔疏謂
求官而薦太子非人情失經旨矣

帝曰吁嚚訟可乎 史記堯曰吁頑凶不用 馬本訟
作庸 臧琳云史以不用釋可乎也 孫星衍云左
傳嚚頑連文釋言詢訟也凶即詢之省

帝曰疇咨若予采 史記堯又曰誰可者 臧琳云省
若予采蒙上順此事也 汝綸案誰可詁疇咨也若
予采即若時登庸故言又曰

都共工方鳩僝功 史記共工旁聚布功可用 說文
作旁逌辱功又作方救僝功 臧琳云方與旁通都
歎美之亂故史以為可用也 汝綸案旁聚猶旁求
也爾雅逌鞠釋文引字林逌聚歛也字亦作求是求
聚同義說文作逌作救其義皆為求也史以僝為布
布功猶膚公詩傳膚大也封禪文祀專漢之東京賦

作布漢說文專度四寸也公羊傳膚寸而合以膚為之是膚布通借也布又通作敷韓詩敷大也布功者大功也方鳩僝功旁求大功也

帝曰吁靜言庸違象恭滔天 史記堯曰共工善言其用僻似恭漫天不可漢書恭作龔 全祖望云幽通賦巨滔天而泯復曹大家注滔漫也 臧琳云史以不可釋經之吁 孫星衍云靜與靖同韓詩靖善也違與回同薛君云回邪僻也漫與慢同詩傳滔漫也 帝曰咨四岳 史記堯又曰嗟四嶽 臧琳云爾雅咨

𡗗也說文獄从山獄聲山古文 汝綸案此與上經
類叙故言又曰

湯湯洪水方割蕩蕩懷山襄陵浩浩滔天 史記湯湯

洪水滔天浩浩懷山襄陵 漢書懷作裒 舊傳懷

包襄上也 臧琳云論語鄭注魯讀坦蕩為坦湯魯

論今文也是古文蕩蕩字今文作湯湯蓋懷山襄陵

上誤衍蕩蕩字 孫星衍云方與旁通說文旁溥也

大誥釋文割馬作害廣雅害割也 汝綸案湯湯蕩

蕩雙聲一義漢賦多有之此史公刪節經字非衍文

也涵漫也上漫天讀湯為惕此讀本字涵天與懷山襄陵相儷為文

下民其咨 史記下民其憂 汝綸案詩傳吁憂也咨吁義近

有能俾乂 史記有能使治者夏本紀云堯求能治水者 說文乂作𠂔 孔疏俾使乂治釋詁文

僉曰於鯀哉 史記皆曰鯀可夏本紀云羣臣四嶽皆曰鯀可 臧琳云爾雅僉皆也史以可釋經之於汝綸案下垂哉益哉史記哉並作可

帝曰吁咈哉方命圯族 史記堯曰鯀負命毀族不可
漢書方作放 金履祥云圯族猶敗類 臧琳云史
以不可釋經之咈哉 錢大昕云釋名負背也
異哉 徐云鄭音異 舊傳異已 汝綸案已如已予
小子之已通作熙見王莽大誥廣韻異歎也

試可乃已 史記試不可用而已 夏本紀云四嶽曰等
之未有賢于鯀者願帝試之 臧琳云乃而也 錢
大昕云古人語急以不可為可也

帝曰往欽哉 史記堯於是聽獄用鯀 臧琳云此以

義釋經也

九載績用弗成 史記九歲功用不成夏本紀云治水九年而水不息功用不成於是帝堯乃求人更得舜
孔疏釋天載歲也 汝綸案績用連文歸熙父詩績
用何年成用此文也

帝曰咨四岳 史記堯曰嗟四嶽

哭朕位 史記踐朕位 孫星衍云哭踐聲近韓詩踐
任也

否德 史記鄙德 釋文否又音鄙 舊傳否不 臧

琳云論語予所否者論衡作鄙釋文音鄙此馬鄭義
汝綸案鄙亦不也釋名鄙否也小邑不能遠通也
此以不訓鄙也荀子賦篇君子所敬而小人所不以
不為鄙漢武帝策董仲舒文或仁或鄙猶詩之或聖
或否此以鄙為否否不同字鄙德即不德也

明明揚側陋 史記悉舉貴戚及疏遠隱匿者 孫星
衍云爾雅陋隱也 汝綸案皇氏樂記注揚舉也高
誘淮南覽冥注揚明也是明揚同義故皆為舉下明
解詁所云高明之家是也側與穆通高注呂覽權勳

篇穆不見之也不見故云疏遠也

師錫帝曰 史記象皆言於堯曰 汝綸案爾雅錫予
同訓予言同訓故錫訓為言召誥入錫周公亦入言
於周公也

有鰥在下 史記有矜在民間

帝曰俞子聞如何 史記堯曰然朕聞之其如何 孔
疏俞然釋言文

瞽子父頑母嚚象傲克諧以孝烝烝乂不格姦 史記
盲者子父頑母嚚弟傲能和以孝烝烝治不至姦

舜紀云舜父瞽叟盲而舜母死瞽叟更娶妻而生象
象傲瞽叟愛後妻子常欲殺舜舜避逃及有小過則
受罪順事父及後母與弟日以篤謹靡有懈 楊孟
文石門頌又作艾 舊傳烝進也 汝綸案舊傳以
烝烝為進進是也詩箋烝烝猶進進也進進蓋古語
有之廣雅以烝烝為孝者因此經立詁非本義也史
記酷吏傳云吏治烝烝不至于姦即用此文豈得以
吏治為孝乎蔡邕九疑山碑云克諧頑傲以孝烝烝
槩括此經以就韻耳非經讀也克諧若屬上讀不詞

甚矣不至于姦者即所謂日以蕉謹靡有懈列女傳云舜猶內治靡有姦意是也姦或間之借字春秋昌間公羊作昌姦不格姦不至有間也

帝曰我其試哉 堯曰吾其試哉 王充論衡云堯聞舜賢四嶽舉之心知其奇而未必知其能故言我其試哉試之于職妻以二女觀其夫婦之法職治脩而不廢夫道正而不僻復令入野而觀其聖逢烈風疾雨終不迷惑堯乃知其聖授以天下 孔疏馬鄭王本說此經皆無帝曰當時庸生之徒漏之也

女于時觀厥刑于二女 史記於是堯妻之二女觀其德于二女 汝綸案史以於是釋于時也女一字為句杜預左傳注以女妻人曰女史所云妻之二女也此夏史之辭非堯言爾雅刑法也有德乃可法故史釋之為德

釐降二女于媯汭 史記舜飭下二女於媯汭 舊傳舜所居媯水之汭 臧琳云史公皆以釐為飭爾雅降下也 汝綸案項羽紀索隱云彼自歸服曰下釐降者謂治服之所謂刑也

嬪于虞 史記如婦禮 舊傳嬪婦也

帝曰欽哉 史記堯善之 汝綸案欽與歆同史記游
俠傳不伐其能歆其德王念孫云漢書本作欽是其
證詩鼓鍾欽欽傳曰欽欽言使人樂進也是欽有喜
樂之義繁欽字休伯休亦喜也欽哉猶休哉也封禪
文欽哉符瑞臻茲與此欽哉正同

慎徽五典五典克從 左傳無違教也 史記乃使舜

慎和五典五典能從 汝綸案徽與懷桓一聲之轉
詩傳懷和也水經注引鄭和夷注云和讀曰桓慎為

順之借字慎徽者順和也和之言宣也王引之說周禮和布為宣布徽亦宣也易六爻發揮謂發宣也文選注揮與徽古字通古經簡奧史增乃使舜三字而義顯舜紀亦云於是堯乃試舜五典百官皆治是說此經也

納于百揆百揆時序 左傳無廢事也 史記徧入百官百官時序 孫星衍云廣雅釋詁選入也徧入徧選也 王引之云時序者承順也鄭禮注詩猶承也時詩聲相近楚策仰承甘露新序承作時是時承同

義 汝綸案左傳以揆有事釋有揆故史記以為有
官鄭樂記注官猶事也

賓于四門四門穆穆 左傳無凶人也 史記賓于四
門四門穆穆諸侯遠方賓客皆敬 舜紀云舜賓于
四門乃流四凶族遷于四裔以御魑魅於是四門辟
言毋凶人也 鄭云賓讀為擯惠棟云賓為古文擯見
儀禮鄉飲酒注 孫星衍云穆穆為敬釋訓文 汝
綸案四門謂四方以門喻也故史釋為諸侯遠方言
賓客者承擯字為文擯亦譬況之字非身為擯也無

凶人故皆敬也

納于大麓烈風雷雨弗迷 史記堯使舜入山林川澤
暴風雷雨舜行不迷堯以為聖 馬云麓山足也
汝綸案淮南子云既入大麓烈風雷雨而不迷漢初
舊說與史記同

帝曰格汝舜 史記召舜曰 汝綸案格之義當為告
解在湯誓

詢事考言乃言底可績三載 史記女謀事至而言可
績三年矣孫星衍云宋本北堂書鈔歎美部引詢事

考言乃底可續則古本乃下無言字以詢為謀釋詁
文底為至者釋言云底致也致即至也周語注底至
也 汝綸案史記說皋謨云女言致可續行是以續
為行也

汝陟帝位 史記女登帝位 汝綸案說文陟登也

舜讓于德弗嗣 史記舜讓於德不憚徐廣曰今文尚

書作不怡怡憚也 段玉裁云台聲司聲古音同部

故公羊治兵作祠韓詩嗣音作詒史記索隱憚一作

澤說文無憚澤即憚也 汝綸案太史公自序云唐

堯遜位虞舜不台漢書稱遷書載堯典諸篇多古文
說是經作不台而訓為不懌者古文說也韋昭漢書
注云古文台為嗣者馬鄭本古文不必與史公同也
班固典引云有于德不台淵穆之讓三國志注載魏
王上書云猶執謙讓于德不嗣是古讀舜讓為句于
德不台為句高誘淮南注志德也是德志同義康誥
朕心朕德謂朕心朕志也于德不台者於意不說也
志意古通訓

正月上日 馬云上日朔日也

受終于文祖 史記舜受終于文祖文祖者堯太祖也
於是帝堯老命舜攝行天子之政以觀天命 孔疏
堯始祖之廟不知為誰也帝繫及世本皆云黃帝為
堯之高祖

在璿璣玉衡以齊七政 史記舜乃在璿璣玉衡以齊
七政 天官書云北斗七星所謂旋璣玉衡以齊七
政杓携龍角衡殷南斗魁枕參首用昏建者杓杓自
華以西南夜半建者衡衡殷中州河濟之間平旦建
者魁魁海岱以東北也斗為帝車運于中央臨制四

鄉分陰陽建四時均五行移節度定諸紀皆繫於斗
律書云太史公曰故旋璣玉衡以齊七政即天地
二十八宿十母十二子鐘律調自上古建律運厯造
日度可據而度也合符節通道德即從斯之謂也

汝綸案史以旋璣玉衡為北斗者春秋文耀鉤云斗
者天之喉舌玉衡屬杓魁為旋璣蕭吉五行大義引
尚書說旋璣斗魁四星玉衡杓橫三星是前漢舊說
與史公同漢律厯志云衡平也其在天也佐助旋璣
斟酌建指以齊七政蓋用大傳北極為旋璣之說其

以玉衡為北斗亦與史公同後漢馬鄭諸儒始以渾儀說之史公不言渾儀渾儀起於後世非唐虞之器也揚子法言或問渾天曰洛下閎營之解于安人度之耿中丞象之是渾儀造于漢代文耀鉤謂唐虞卽位羲和立渾儀者非也史公說七政具在厯書謂天也地也星辰也日也月也鐘律也厯也其稱二十八宿者星辰也十母者日也十二子者月也鐘律調自上古者律也建律運厯造日度者厯也是天地星辰日月律厯為七政也其云故旋璣玉衡故者古也大

傳以四時天地人為七政者靈曜以為日月五星皆與史公不合爾雅在察也大傳齊中也

肆類于上帝 史記遂類於上帝 五經異義古尙書說非時祭天謂之類言以事類告也時舜告攝非常祭也 孫星衍云呂叔玉國語注肆遂也

禋于六宗 馬云禋精意以享也 五經異義古尙書說六宗天地神之尊者謂天宗三地宗三天宗日月北辰地宗岱山河海日月為陰陽宗北辰為星宗岱為山宗河為水宗海為澤宗祀天則天文從祀祀地

則地理從祀

汝綸案古尙書說者賈逵說也岱宗

見于尙書天宗見于月令河宗見于穆天子傳盧植
注月令云天宗六宗之神鄭月令注亦以日月星辰
為天宗并同古尙書說駁異義乃云山川言望則六
宗無山川郊祭主日配月則郊天并祭日月因以星
辰司中司命風伯雨師為六宗唐虞時未必有司中
司命等名此所謂引唐律以斷漢獄者也郊天并祭
日月蓋亦周制五帝三王不同物唐虞未必爾也古
尙書所云祀天則天文從祀祀地則地理從祀亦是

推論後代之制史記云自禹興而修社祀是唐虞無
祭地之禮矣鄭謂山川言望則六宗無山川然周禮
注以四望為五嶽四瀆而周禮四望之下每別
言祀山川則嶽瀆不兼其餘山川矣此六宗有岱山
河海而下復言山川正與周禮四望山川並舉者同
例不足異也六宗自前漢以來眾家聚訟應以古尙
書說為定

望于山川 江聲云范甯穀梁注引鄭氏曰望者祭山
川之名

徧于羣神

史記辯于羣神徐廣曰辯音班

後漢志

徧作班

江聲云鄭禮注今文辯皆作徧士虞禮注

古文班為辯

輯五瑞

史記揖五瑞

白虎通云何謂五瑞謂珪璧

琮璜璋也五王者各何施蓋以為璜以徵召璧以聘

問璋以發兵珪以質信琮以起土功之事也 馬云

揖歛也

惠棟云漢碑皆以揖為輯漢書注引作揖

既月乃日

史記擇吉日

汝綸案既月乃日與詩

既景乃岡文法正同

觀四岳羣牧 史記見四嶽諸牧 孔疏觀見釋詁文
汝綸案白虎通云唐虞謂之牧者使大夫牧視諸
侯故謂之牧方言牧察也白虎通又云舜始即位見
四方諸侯合符信是釋四岳為四方史記云四嶽各
如其方是也下四海遏密八音史記釋為四方皆舉
海岳以名方也

班瑞于羣后 史記無于羣后三字 封禪書班作還

汝綸案封禪書班為還者爾雅般還也班與般同
左傳曹伯班公羊作般史無于羣后者蒙上羣牧而

省之

歲二月 鄭云歲二月者正歲建卯之月也

東巡狩至于岱宗 史記封禪書云岱宗泰山也 何

休公羊注云王者所以必巡狩者天下雖平自不親
見猶恐遠方獨有不得其所故三年一使三公糾陟
五年親自巡狩巡猶循也狩猶守也循行守視之辭
亦不可國至人見為煩擾故至四嶽足以知四方之
政而已

柴 說文作柴 白虎通云巡狩必祭天何本巡狩為

天祭天所告至也 馬云祭時積柴加牲其上而燔之
望秩于山川 鄭云徧以尊卑秩次祭之秩次也 孔
疏四時各至其方岳望祭其方岳山川

肆覲東后 史記遂見東方君長 封禪書云東后者
諸侯也

協時月正日 史記合時月正日 白虎通協作叶
鄭云協正四時之月數及日名備有失誤 孫星衍
云文選六代論注月數謂閏月正四時日名謂甲乙
之類 汝綸案律書云天下有道則不失紀序無道

則正朔不行于諸侯左傳履端于始舉正于中歸邪於終此合時月之事曰官居卿以底日日御不失日以授百官于朝此正日之事

同律度量衡 漢律厯志云虞書曰乃同律度量衡所以齊遠近立民信也律十有二陽六為律陰六為呂度者分寸尺丈引也所以度長短也本起黃鐘之長量者龠合升斗斛也所以量多少也本起於黃鐘之龠衡權者衡平也權重也衡所以任權而均物平輕重也本起黃鐘之重凡律度量衡用銅者名曰名也

所以同天下齊風俗也 王肅云同齊也

修五禮 汝綸案五禮之說未聞或當如五典五品五
作之類孔疏云帝王之名既異古今之禮或殊其說
是也皋謨五禮齊召南謂即五典之品式馬注五瑞
鄭注五禮皆以五等諸侯說之非是史記諸侯王表
序云殷以前尚矣周封五等則殷前列爵史公所不
言白虎通引含文嘉云殷爵三等禮緯云夏爵亦三
等雖無以決其必然要五等自是周制唐虞無有也
白虎通巡狩篇引此脩五禮而說之以考禮義正法

度蓋是也

五玉 漢郊祀志作五樂 汝綸案樂乃玉之誤字史
記五帝紀封禪書并作五玉郊祀志正錄史記封禪
書之文不應改字師古注云今志亦有作五玉者是
也顏所據誤本耳白虎通巡狩篇引尚書曰遂覲東
后叶時月正日同律度量衡脩五禮朝聘篇引書曰
五玉三帛二生一死贄是班讀脩五禮屬上為詞五
玉屬下為句其不以為五樂明矣白虎通又說之云
公執玉其瑞贄篇云公侯以玉為贄五經異義許慎

案五玉贄自孤卿以下執禽尊卑之差也是皆尙書
舊說五玉據白虎通說即珪璧琮璜璋也以為五等
諸侯所執者非是

三帛 鄭云帛所以薦玉也高陽氏之後用赤繒高辛
氏之後用黑繒其餘諸侯用白繒周禮改之為纁也
二生 封禪書作二牲漢郊祀志同 孫星衍云白虎
通卿大夫贄古以麋鹿今以羔雁據此則唐虞二生
是麋鹿也

一死 馬云一死雉士所執也 汝綸案白虎通云卿

經說二之一

卅

大夫贄變君與士不變是士雉古今皆同

贄 史記云為摯 說文作藝云執至也

如五噐卒乃復 馬云五噐上五玉孔䟽釋言云還復

返也是還復同義五噐文在贄下則是贄內之物周禮大宗伯云以玉作六噐知噐即五玉如若也言諸侯贄之內若是五噐禮終乃還之聘義云以圭璋聘重禮也已聘而還圭璋此輕財而重禮之義也聘義主於說聘其朝禮亦然周禮司儀云諸公相見為賓還圭如將幣之儀 汝綸案孔據馬義為說而引聘

義司儀以證還圭其說是也然士相見禮言已臣則
不還其贄是天子無還贄之禮還者乃五器五器即
五瑞也馬言五玉禮終則還三帛以下不還是公侯
還贄孤卿以下不還贄其義未安據白虎通云五玉
所施非一不可勝條然則五玉不僅為五器大宗伯
以璧琮圭璋琥璜為六器小行人又以此六物為六
幣皆本唐虞五玉而增琥為六觀禮記所云設六玉
亦即此文五玉也如周禮之言則玉為器又為幣大
宰職有器貢幣貢是器與幣本不周公侯以五玉為

贄計當器幣并陳禮終則受其幣而還其器故曰如
五器卒乃復明幣則不還也白虎通云珪所以還何
以為珪信瑞也璧所以留者以財幣盡輒更造何以
言之禮曰珪造尺八寸有造珪明得造璧也此還器
留幣之說圭多用于器故信瑞以圭言璧多用于幣
故財幣以璧言其下明以造珪造璧證幣盡更造之
說則非謂還者無璧留者無珪矣五器明是摯物故
封禪書引經省此文若如王引之說以如為與則五
器乃在贄外史公不得脫遺之矣王又謂卒乃復為

令諸侯還國天子未行諸侯先去亦非其理也鄭注
尙書殘闕難考集韻如乃個切若也書曰如五噐卒
乃復鄭康成讀據此則鄭讀如為那而訓為若矣

五月南巡狩至于南岳如岱禮八月西巡狩至于西岳
如初十有一月朔巡狩至于北岳如西禮 史記五帝

紀五月南巡狩八月西巡狩十一月北巡狩皆如初
封禪書五月巡狩至南嶽南嶽衡山也八月巡狩
至西嶽西嶽華山也十一月巡狩至北嶽北嶽恒山
也皆如岱宗之禮中嶽嵩高也 何休公羊注引此

經西岳下無如初二字如西禮下有還至嵩如初禮
六字 馬鄭本如西禮作如初鄭云五月不言初者
以其文相近八月十一月言初者文相遠故也 孔
疏釋山云江南衡李巡云衡南岳衡山也釋山又云
霍山為南岳郭璞云霍山今在廬江潯縣漢武帝以
衡山遼曠故移其神於此風俗通云衡山一名霍山
歸格于藝祖 史記歸至于祖禰廟 白虎通巡狩篇
引尚書曰歸假于祖禰 馬云藝禰也 汝綸案尚
書本作祖藝故王制云歸假于祖禰與白虎通同史

公但增廟字釋之并未倒易經字白虎通三軍篇云王者將出辭于禘選格于祖禘引王制造于禘及此經格于祖禘為證其云獨見禘者說王制非說此經也至鄭以文祖釋藝祖何注公羊引此經作禘祖釋文禘又作菽則經字已倒與馬班所見本異矣今據鄭本而說為禘祖則稱名不順當以史記正之或謂祖為廟藝祖即禘廟其文雖順亦與史記不合且諸書用此經皆言祖禘無言禘廟者故知非也祖禘廟者堯之祖禘廟也舜父蓋尚存

用特 史記用特牛禮

五載一巡狩羣后四朝 史記載作歲 鄭云巡狩之

年諸侯見於方嶽之下其間四年四方諸侯分來朝
于京師也

敷奏以言 史記徧告以言 孫星衍云詩傳敷猶徧

也 汝綸案史記奏為告者詩以奏膚公猶告厥成功
大元臚湊羣辟謂臚告羣辟也徧告者徧戒之也

明試以功 汝綸案詩傳功事也

車服以庸 江聲云釋詁庸勞也汝綸案此倒句與上

文法不同謂勞以車服也

肇十有二州封十有二山濬川 史記肇十有二州決
川 大傳肇作兆 馬云禹平水土置九州舜以冀
州之北廣大分置并州燕齊遼遼分燕置幽州分齊
為營州於是為十二州也 汝綸案肇兆同字鄭大
傳注兆域也如孟子域民之域春秋說題辭云州之
言殊也史記無封山句以封山即肇州之事也賈逵
左傳注封謂識之分州以山識之也

象以典刑 舊傳象法也法用常刑 汝綸案典刑謂

五刑也漢書刑法志聖人因天討而作五刑大刑用
甲兵其次用斧鉞中刑用刀鋸其次用鑕笞薄刑用
鞭朴此鞭朴在下文故不言五

流宥五刑 馬云流放宥寬也 汝綸案鄭以流宥為
九刑之一流宥五刑即五流也

鞭作官刑 馬云為辨治官事者為刑 孔疏用鞭久
矣大隨方便廢之

扑作教刑 鄭云扑撻楚也扑為教官為刑者

金作贖刑 馬云意善功惡使出金贖罪坐不戒慎者

孔疏古贖罪皆用銅漢始用黃金

眚灾肆赦 史記眚裁過赦 鄭云眚灾為人作患害者也過失雖有害則赦之 汝綸案穀梁傳肆失也故史訓為過

怙終賊刑 史記集解終一作冢 鄭云怙其姦邪終身以為殘賊則用刑之 汝綸案冢終通借怙冢即怙終也

欽哉欽哉惟刑之恤哉 史記恤作靜徐廣曰今文作謐爾雅謐靜也 王引之云靜與慎同義卹亦慎也

汝綸案之是也惟宜也惟刑之恤者宜刑是慎也
此於叙事中記其戒命之辭著慎刑也

流共工于幽洲放驩兜于崇山竄三苗于三危殛鯀于
羽山四罪而天下咸服 史記驩兜進言共工堯曰不
可而試之工師共工果淫辟四嶽舉鯀治鴻水堯以
為不可嶽彊請試之試之而無功故百姓不便三苗
在江淮荊州數為亂於是舜歸而言于帝請流共工
于幽陵以變北狄放驩兜於崇山以變南蠻遷三苗
于三危以變西戎殛鯀于羽山以變東夷四羣而天

下咸服 孟子幽州作幽州莊子作幽都竄孟子作
殺說文作竄 舊傳作者先叙典刑而連引四罪明
皆徵用所行於此摠見之 段玉裁云殺即說文繫
字之假借夏本紀舜行視縣之治水無狀乃殛縣於
羽山以死殛是極之假借極窮也孟子極之於所往
是也 汝綸案歸有光言史記堯紀四皐在攝位後
舜紀以為賓于四門事一據孟子一據左氏以備異
說非牴牾愚謂堯舜二紀乃一篇之文若兼備異說
即是前後牴牾矣左傳所云流四凶族賈服諸儒以

牽合驩兜共鯀史記無是說也至縉雲氏則賈服亦不以為三苗鄭以左傳文解此四羣乃謂三苗為饗饗據史記則流四凶在賓四門時四羣在攝政後明非一事賈鄭合而一之非其實矣又鯀治水九年而舜攝位則在用事二十年後攝位後乃誅鯀如此則鯀之稽誅久矣四罪蓋非一時事史總言之若史記孝文紀摠叙代來以後事韓愈平淮西碑類記數年之事皆此類也

二十有八載帝乃殂落

史記堯立七十年得舜二十

年而老令舜攝行天子之政薦之於天堯辟位凡二十八年而崩 孟子作放勳乃殂落說文作放勳乃殂 孔疏釋詁殂落死也 段玉裁云二十八載合厯試二十年言之孟子所謂舜相堯二十有八載也百姓如喪考妣三載四海遏密八音 史記百姓悲哀如喪父母三年四方莫舉樂以思堯 孟子三載作三年趙岐孟子注遏止也密無聲也 汝綸案父母為考妣者釋親文郭注引倉頡篇考妣延年證生稱考妣是也史記百姓不說為石宮舊傳云石宮者非是

月正元日舜格于文祖詢于四岳闢四門明四目達四聰 史記舜得舉用事二十年而堯使攝政八年而堯崩三年喪畢讓丹朱天下歸舜而禹皋陶契后稷伯夷夔龍垂益彭祖自堯時而皆舉用未有分職於是舜乃至於文祖謀于四嶽辟四門明通四方耳目 梅福云博覽兼聽謀及䟽賤今深者不隱遠者不塞所謂辟四門明四目也 薛綜東京賦注引月正作正月說文闢開也引書作開杜預左傳注聰作憲 孔䟽詢謀釋詁文 王引之云張衡東京賦以元日

為朔日

咨十有二牧曰食哉 史記命十二牧論帝德 孫星
衍云釋詁食偽也偽即為也言勸使有為 汝綸案
孫讀自食哉絕之以惟時下屬為句是也此為命十
二牧論帝德之言虞翻易注王弼老子注並云食用
也食哉者用哉也言用帝德也下惟時之時即指謂
帝德不以增字為嫌也戰國衛策云始君之所行于
世者食高麗也高誘注食用也麗美也務用高美觀
目而已不務用德也此經之食與彼文食高麗正同

咨為命者諮謀與命告義近史公訓咨為可為憂為命後人皆失其詁

惟時柔遠能邇惇德允元而難任人蠻夷率服 史記

行厚德遠倭人則蠻夷率服 舊傳柔安邇近惇厚

任倭難拒也倭人斥遠之 王引之云詩民勞箋能

猶如也順如其近者仰如古字通漢督郵班碑作柔

遠而邇易屯象傳鄭本而作能云能猶安也 汝綸

案惇敦同字爾雅敦勉也允統同字說文執進也盧

植月令注元善也惇德允元者勉德進善也安遠順

近勉德進善是史記所云行厚德也爾雅率自也

舜曰咨四岳 史記舜謂四嶽曰 夏本紀作帝舜問

四嶽 舊傳言舜曰以別堯

有能奮庸熙帝之載 史記有能奮庸美堯之事者

夏本紀云有能成美堯之事者 馬云奮明庸功也

孫星衍云熙為美者經庶績咸熙漢律厯志作衆

功皆美載為事者周書謚法解文 汝綸案夏本紀

以奮庸為成也馬注奮為明庸為功爾雅明功皆訓

成也

使宅石揆亮采惠疇 史記使居宮相事 夏本紀云

使居宮 汝綸案史以居宮詒宅石揆以相事詒亮

采而惠疇無說者語詞也舊傳以誰乎釋疇蓋是漢

人舊詒惠者詞之謂也盤庚女謂朕漢石經謂作惠

是惠猶謂也謂為同字惠疇猶為誰也惠之訓謂訓

為蓋古義也尙書多此訓朕言惠可底行者朕言謂

可致行也予不惠若茲多詒即予不惟若茲多詒也

惟亦為也惠雋叙惟雋叙也爾曷不惠王熙天之命

爾何不為王明天之命也不獨書有之詩曷惠其賓

何為其實也莊子外物篇惠以歡為驚惟以歡為驚也經傳多此訓說者失其詁也馬其昶云左傳伊戾惠牆服注惠詞也是惠為語詞之證居官者度官也謂審度百官也

僉曰伯禹作司空 史記皆曰伯禹為司空可美帝功
夏本紀云可成美堯之功 汝綸案可美帝功者
經蒙上而省史足成之也

帝曰俞咨 史記舜曰嗟然夏本紀同 段玉裁云疑
咨在俞上

禹汝平水土惟時懋哉 史記禹汝平水土維是勉哉
夏本紀禹上有命字勉哉作勉之 孔疏懋勉釋
詁文 汝綸案史記夏本紀禹治水在此命後舊傳
謂稱其前功以命之者非是

禹拜稽首 孫星衍云鄭周禮注稽首拜頭至地也

讓于稷契暨皋陶 史記暨為與 夏本紀作契后稷

皋陶無與字 孫星衍云暨與釋詁文

帝曰俞汝往哉 史記舜曰然往矣 夏本紀舜曰女
其往視爾事矣 鄭云然其舉得其人汝往居此官

不聽其所讓 王引之云哉猶矣也

帝曰棄黎民阻飢 史記舜曰棄黎民始飢徐廣曰今

文作祖 馬云祖始也

汝后稷 列女傳后作居 鄭云汝居稷官 汝綸案

舊傳上文稷云居稷官者弃也足證舊傳本亦作居
史記作后者後人據誤本改之

播時百穀 鄭云時讀曰時

帝曰契 史記舜曰契 說文僕高辛氏之子堯司徒
殷之先漢表作禹

石姓不親 汝綸案鄭注九族既睦云睦親也親睦同義

五品不遜 史記五品不馴 說文遜作遜後漢鄧禹傳作訓 汝綸案遜者訓之借字不遜孟子所云逸居無教也康誥未有遜事荀子云言先教也是遜為教也馴者徐廣以為古訓字也

汝作司徒敬敷五教在寬 史記汝為司徒而敬敷五教在寬 馬云五品之教 阮元云列女傳引此經有而字蔡邕司空楊公碑同

帝曰皋陶 史記舜曰皋陶 說文作咎繇

蠻夷猾夏寇賊姦宄 史記宄作軌 鄭云猾夏侵亂

中國也強取為寇殺人為賊由內為姦起外為軌

汝作士 鄭云士察也主察獄訟之事 孫星衍云士

察釋詁文

五刑有服五服三就 魯語臧文仲云大刑用甲兵其

次用斧鉞中刑用刀鋸其次用鑕筆薄刑用鞭朴故

大者陳之原野小者致之市朝五刑三次韋昭注次

處也三處野朝市也 汝綸案鄭石制字子服是服

猶制也呂刑之上服下服即考工記所云上制中制下制也楊倞荀子注制謂差等也典瑞疏及儀禮聘禮疏并云就即等也此經言五刑有制五制三等也三等即野市朝也

五流有宅五宅三居 史記五流有度五度三居 馬云謂在八議君不忍刑宥之以達五等之差亦有三等之居大罪投四裔次九州之外次中國之外 汝綸案中國之外舊傳作千里之外是也孔疏云言中國者據罪人所居之國定千里也蓋是舊說宅度同

字皆訓為居此經服就同義宅居同義也五派之目未聞疑即議親議故等而後世增為八議也

惟明克允 史說維明能信 汝綸案信即獄成而孚之孚猶後世所云信讞也白虎通云信者誠也專一不移也

帝曰疇若予工 史記舜曰誰能馴予工馬云謂主石工之工也孫星衍云馴同順

僉曰垂哉 史記皆曰垂可 徐邈垂音睡 段玉裁云垂他書皆作僊

帝曰俞咨垂汝共工 史記於是以垂為共工
垂拜稽首讓于父析暨伯與帝曰俞往哉汝諧 史記
無此文漢書人表作朱析柏譽 段玉裁云古伯多
借柏 孫星衍云諧者偕也使偕往治事 汝綸案
史無此讓疑今本脫

帝曰疇若予上下草木鳥獸 史記舜曰誰能馴予上
下草木鳥獸 馬云上謂原下謂隰 汝綸案秦本
紀調馴鳥獸是此馴為調馴與上馴予工之馴釋為
順義者自別

僉曰益哉 史記皆曰益可 秦本紀大費佐舜調馴
鳥獸鳥獸多馴服是為柏翳舜賜姓嬴氏 金履祥
云柏翳即伯益 汝綸案馬鄭王本僉曰作禹曰史
記作皆或後人所改子雲羽獵賦云昔者禹任益虞
是楊所據本亦作禹曰也鄭詩譜高誘淮南注并以
益為皋陶子非也秦本紀大費為大業子漢地理志
秦之先伯益佐禹治水為舜虞官養草木鳥獸賜姓
嬴氏金謂柏翳即伯益是也

帝曰俞咨益汝作朕虞 史記於是以益為朕虞 段

王裁云石官公卿表益作朕虞應劭注九官曰益朕
虞皆以朕虞為官 汝綸案地理志亦云柏益堯時
佐禹治水為舜朕虞王莽更名水衡都尉曰予虞段
氏譏之非是段固自言漢人皆以朕虞為官共工秩
宗納言等均不言朕則此朕虞非自稱之朕呂覽具
秩曲簾筐高誘注秩讀曰朕廣雅秩校同訓郭璞方
言注秩亦名校然則朕秩通借其義猶校漢書司馬
相如傳注以木相毋穿總為欄校朕虞猶校人校尉
耳莽作予虞者以本義通其引申之義也史記趙高

曰天子稱朕固不聞聲亦以本義通其引申之義古人多此例也

益拜稽首讓于朱虎熊羆 史記讓于下多諸臣二字
段玉裁云左氏伯虎仲熊叔豹季狸季狸古今人
表作季熊熊疑羆之誤即益所讓之虎熊羆蓋朱虎
熊羆四人名也 汝綸案鄭孔皆以為二人

帝曰俞往哉汝諧 史記舜曰往矣汝諧遂以朱虎熊
羆為佐

帝曰咨四岳 史記舜曰嗟四嶽

有能典朕三禮 馬云三禮天神地示人鬼之禮也

僉曰伯夷 史記皆曰伯夷可

帝曰俞咨伯 史記舜曰嗟伯夷 白虎通尚書曰咨

爾伯不言名也 汝綸案此及上往哉汝諧史均不

釋俞字省之也云伯夷者史補之

汝作秩宗 史記以汝為秩宗 張守節云漢書石官

表王莽大常曰秩宗依古也

夙夜惟寅直哉惟清 史記夙夜維敬直哉維靜絜

汝綸案史記清為靜絜者思乎賦舊注清靜也薛綜

東京賦注清潔也高誘呂覽注惟宜也鄭喪大記注直當也哉與載通借周書謚法解載事也直哉者當事也此戒伯夷蚤夜宜敬當事宜靜潔也

伯拜稽首讓于夔龍 史記伯夷讓夔龍

帝曰俞往欽哉帝曰夔命汝典樂 史記舜曰然以夔為典樂 汝綸案史不釋往欽哉者取便文也

教胄子 史記教穉子說文作育云育養子使從善也馬云胄長也 惠棟云育亦訓長見爾雅 王引之云育胄古聲相近鄭詩箋育穉也育子即鬻子鞠子

周書太子晉篇亦謂未冠者為冑子也 柯劭忞云
周禮大司樂注云若舜命夔典樂教育子是鄭本作
育馬本亦當作育爾雅育長也馬依雅訓史以穉訓
育亦依雅義釋言毓穉也毓即育今作冑王肅本也
直而溫 孔疏大司樂以樂德教國子中和祗庸孝友
是言樂官用樂教之使成此六德也此直而溫下三
句皆使夔教冑子令性行當然

寬而栗 孫星衍云聘義縝密以栗注栗堅兒
剛而無虐簡而無傲 舊傳剛失入虐簡失入傲

詩言志歌永言 史記詩言意歌長言 孫星衍云鄭

注檀弓云志意也永為長者釋詁文

聲依永 汝綸案上永言之永史記作長此永依字讀
知與上義異永者詠之借字也

律和聲 鄭云聲中律乃為和也

八音克諧 史記八音能諧說文諧作𪛗云樂和𪛗也

無相奪倫 史記毋相奪倫 汝綸案廣雅奪敫也趙

岐孟子注倫序也奪倫者易次也

神人以和 鄭云祖考來格羣后德讓其一隅也

夔曰於 汝綸案命官忽記夔言美韶樂也與前欽哉
恤刑文法相類

予擊石拊石百獸率舞 鄭云石磬也率舞言音和也
孔疏八音之音石磬最清舉清者和則其餘皆從
矣商頌云依我磬聲擊是大擊拊是小擊 汝綸案
率舞自舞也若游魚出聽六馬仰秣之類

帝曰龍朕聖讒說殄行 史記舜曰龍朕畏忌讒說殄
偽 集解讒一作齊 說文聖疾惡也 汝綸案說

悅古今字復本紀讒說作讒嬖韋昭國語注以邪辟

取愛曰嬖楚詞愍命云斥讒夫與便嬖高誘呂覽貴
因篇注讒邪也讒說者邪嬖也集解讒作齊者荀子
非十二子篇齊給便利齊嬖猶便嬖也詩箋殄善也
爾雅行言也殄行者善言也史記行作偽者偽訛一
聲之轉爾雅行訛同訓言也此命納言故以善言為
戒舊讀德行之行失之

震驚朕師

史記振驚朕眾

孫星衍云震動師眾釋

詁文作振者廣雅振動也

命汝作納言

史記命汝為納言

應劭漢書注納言

如今尚書管王之喉舌也

夙夜出納朕命 史記夙夜出入朕命 孫星衍云漢
石宮表出入帝命

惟允 史記惟信

帝曰咨汝二十有二人 史記舜曰嗟女二十有二人
蔡傳二十二入四岳九官十二牧也 汝綸案蔡

以四岳為一人是也史記齊世家云其先祖嘗為四
嶽佐禹平水土甚有功國語太子晉以四岳為共工
從孫又曰昨四岳國命為侯伯賜姓曰姜氏曰有呂

此皆四岳為一人之證國語又云一王四伯韋昭以
為四岳長不用馬鄭四人之說以上文所言實非四
人故也舊傳于經言僉曰則云四岳同詞而對不知
僉曰自謂朝臣及岳史記夏本紀釋僉曰鯀哉云羣
臣四嶽皆曰鯀可是其證且經有不咨四岳而言僉
曰者矣堯將遜位豈欲並禪四人岳曰之下繼言師
錫則岳為一人甚明四岳不得為四人猶宅石揆不
得為百人霍光傳九卿責光是也所言九卿乃謂田
延年一人耳至觀四岳羣牧則以四岳為四方與他

四岳義別

欽哉惟時亮天功 史記敬哉惟時相天事 又云此

二十二入咸成厥功

三載考績三考黜陟 史記三歲一考功三考黜陟

白虎通云三年有成故於是賞有功黜不肖

幽明庶績咸熙 史記達近象功咸興

分北三苗 鄭云北猶別也 虞翻云北古別字

舜生三十徵庸三十在位五十載 論衡作徵用二十

史記舜年二十以孝聞年三十堯舉之五十攝行天

子事年五十八堯崩年六十一代堯踐帝位踐帝位
三十九年 孔疏鄭讀此經云舜生三十謂生三十
年也登庸二十謂歷試二十年在位五十載陟方乃
死謂攝位至死為五十年舜年一百歲也

陟方乃死 史記南巡狩崩于蒼梧之野葬于江南九
疑是為零陵 汝綸案陟敕之借字舉謨陟天之命
史記作敕封禪書伊臚集解作敕皆其證釋詁敕勞
也敕方猶省方即史記所云巡狩也孟子云舜死于
鳴條史記云崩于蒼梧鄭云鳴條南夷地名是也或

謂舜已百年巡狩當使禹代之且但當至南岳不得
遠到蒼梧此妄疑也巡狩天子之事禹不得代堯老
舜攝禹益皆止作相所謂薦于天也無攝政之事何
由代天子乎巡狩四岳不言到岳便止南巡蒼梧不
足疑也

皋陶謨

史記帝舜朝禹伯夷皋陶相與語帝前皋陶述其謀
柯劭忞云疑天叙有典至敬哉有土為伯夷之言
而皋陶述之

曰若稽古 鄭以皋陶下屬為句 汝綸案鄭讀如此
知堯典亦然

皋陶曰允迪厥德謨明弼諧 史記皋陶述其謀曰信
其道德謨明輔和 段玉裁云信道其德各本作信
其道德蓋誤 汝綸案段說是下言迪朕德即承此
文也信語詞道導同字

禹曰兪如何皋陶曰都 史記禹曰然如何皋陶曰於
汝綸案爾雅都於也

慎厥身修思永 史記慎其身修思長 漢書元帝永

光四年詔曰慎身修永師古注永上有職字知慎厥
身為句孫星衍云職與思斯聲相近皆語詞 汝綸
案顏讀是孔疏云案傳以修上讀顧氏亦同據此知
馬鄭舊讀當與顏同鄭中庸注修治也修思永者治
斯長也詩言歸思復唐石經思作斯

惇叙九族 史記敦序九族 汝綸案爾雅敦勉也史
記趙世家序往古之勲正義序重也惇叙九族勉重
九族也

庶明厲翼 史記衆明高翼 汝綸案呂覽盡數篇注

明智也王弼易註明猶才也厲高通借月令征爲厲
疾呂覽作高疾是其證廣雅高敬也高翼者敬輔也
邇可遠在茲 史記近可遠在己 汝綸案茲作己者
謂己身即上慎身之愓也

禹拜昌言曰俞 史記禹拜美言曰然 趙岐引昌作
讜 段玉裁云說文昌美言也李善引字林讜言美
言也古昌黨音同

都 史記於

咸若時 史記皆若是

惟帝其難之 姚鼎云帝謂舜也以荆為治者帝王之
病憂乎驩兜遷乎有苗面陳舜之所病如是

知人則哲 史記知人則智 孔疏哲智釋言文

安民則惠 史記能安民則惠

能哲而惠 史記能知能惠 淮南子而作且 孫星

衍云呂覽士容篇注能而也 汝綸案此史公借能

為而其義猶且

何畏乎巧言令色孔任 史記何畏乎巧言善色佞人

汝綸案爾雅任壬佞也壬任通借後漢郅惲傳云

孔任不行即用此經老子孔德之容注孔大也楚詞有孔鳳山海經有孔鳥皆言大也孔王大倭也

皋陶曰都 史記皋陶曰然於 汝綸案今尙書奪俞字當補俞者然禹言

亦行有九德亦言其人有德乃言曰載采采 史記行亦有九德亦言其有德乃言曰始事事 唐石經無人字 汝綸案史記王延詰本亦行作行亦他本皆與尙書同廣雅言從也此經言人之行有九德亦從有其德而後可言事事也上事即九德咸事之事立

置之也下事說文云職也

禹曰何皋陶曰 史記無此六字

寬而栗 孫星衍云九而皆讀能淮南原道篇注而能也

愿而恭亂而敬 史記愿而共治而敬 孔疏亂治釋詁文 段玉裁云謹愿人多不能供辦能治人多不能敬慎德才不能兼也

擾而毅 史記集解擾一作柔 舊傳擾順也 孫星衍云詩崧高揉此万邦鄭云揉順也釋文亦作柔

簡而廉 鄭中庸注引廉作辨 汝綸察廉當讀為辨
鄭論語注魯讀廉為貶周禮士師注辨當為貶是古
讀廉辨聲相近也漢書高帝紀師古注廉察也亦與
辨義近

剛而塞 史記剛而實 說文塞作塞云實也

彊而義 王引之云詩傳義善也左傳不義而彊其斃
必速

彰厥有常吉哉 史記章其有常吉哉 姚鼐云常吉
與立政庶常吉士同即上九德之事立政所言文王

官人正如唐虞之法其惟克用常人言常吉人之也
汝綸案鄭儀禮注古文常為祥常吉者祥吉也爾
雅祥善也說文吉善也有者語詞後漢鄭均傳元和
元年詔云書不云乎章厥有常吉哉亦以常吉為善
人也

曰宣三德 舊傳三德九德之中有其三也 江聲云
韓詩傳宣顯也

夙夜浚明有家 史記蚤夜翊明有家 孫星衍云方
言浚敬也翊與翼同亦敬也明與孟通釋詁孟勉也

翊明言敬勉 汝綸案大傳翊輔也爾雅明成也輔
成有家猶左右有民也柯劭忞云爾雅釋詁昞早也
郭注昞亦明也釋言翌明也昞即浚浚明翌明猶祇
敬振敬皆二字連文此書古義之廋存於爾雅者可
與史文互證有猶於也夙夜旦明於家亮采於國對
文也

曰嚴祇敬六德 史記曰嚴振敬六德 釋文嚴馬徐
魚檢反 段玉裁云祇振古通用內則注祇或為振
汝綸案嚴祇敬三字同義嚴祇敬六德即敬六德

也累二字為句無逸嚴恭寅畏天命即敬天命也累
四字為句康誥庸庸祗祗畏畏顯民即敬顯民也累
六字為句皆尚書句例也

亮采有邦 史記亮采有國 汝綸案堯典亮采史以為
相事知此文亦言相事于國

翕受敷施 史記翕受普施 舊傳翕合也 孫星衍
云司馬彪莊子注施用也詩傳敷徧也趙注孟子普
徧也普敷音義同 汝綸案此謂三德六德合成九
德無求備于一人

九德咸事 汝綸案鄭郊特牲注事猶立也仲尼燕居
注事之謂立置于位也

俊入在宮百僚師師百工惟時撫于五辰庶績其凝

史記俊入在宮百吏肅謹 漢書谷永傳入作父

鄭云疑成也 孫星衍云詩傳時善也辰時也工宮

也五時謂之五辰後漢東平王蒼傳有五時衣各一

襲 汝綸案史以百吏肅謹最括百僚師師以下之

文廣雅師師衆也工與功同爾雅功事也百工百事

也爾雅惟謀也時如以奏爾時之時亦善也五辰五

緯星也說文撫循也于讀介于石之于猶如也言有
官謀欲善事其遲速赴功如五星之順循也謂四時
為五時後世之說古殆無有

無教逸欲 史記無教邪淫奇謀 王嘉封事作無教

佚欲陳蕃上書作無教逸遊 孫星衍云史公說佚

為邪淫者方言佚淫也欲為奇謀者禮記注引詩匪
革其猶猶欲聲相近釋詁猷謀也欲又作遊與猷通
周禮師氏貴遊子弟杜子春云遊當為猶 汝綸案
教當依漢書作敖廣雅驚安也敖驚同字此與般庚

無傲從康文同無傲佚欲者無妄佚遊也史以無教
邪淫奇謀釋經之無傲佚欲非經字本作教也奇邪
同義周禮宮正奇褻之民注奇褻譎觚非常內宰禁
其奇褻字通作踦盧辯大戴注踦邪也

有邦兢兢業業一日二日萬幾 史記無此二句 王
嘉疏邦作國幾作機 孔疏釋訓兢兢戒也業業危
也 蔡傳一日二日言其日之至淺萬幾言其幾事
之至多

無曠庶官天工人其代之 史記非其人居其官是謂

亂天事 漢律厯志工作功 馬嚴封事云言王者
代天宮人也 論衡曠空庶衆也實非其人與空無
異故言空也

天叙有典勅我五典五惇哉天秩有禮自我五禮有庸
哉同寅協恭和衷哉天命有禮五服五章哉天討有罪
五刑五用哉 史記天討有罪五刑五用哉無上七句
馬本有典作五典有庸作五庸後漢梁統傳五用
作五庸 舊傳五服天子諸侯卿大夫士之服也尊
卑采章各異 孔疏叙謂定其倫次秩謂制其差等

義亦相通 齊召南云五禮即五典之品式 汝綸
案廣雅勅順也惇敦同字爾雅敦勉也鄭雜記注自
率也大元有尾信可以為庸范望注庸法也協恭猶
同寅復語也蔡邕中鼎銘同寅協恭以和天衷是古
說此衷為天衷天衷者天心也晉灼王莽傳注和合
也合天心者即上勉天叙法天秩鄭謂并上典禮共
有此事是也此戒有邦庶官故曰同曰協而下復以
敬哉有土結之也史記獨載天討者皋陶之言以刑
為主上三事皆容義也大傳說五章以山龍璫火等

為言皆舜觀象作服後事舊傳之義為長

政事懋哉懋哉 自此至敬哉有土皋陶曰史記無

董仲舒對策云書云茂哉茂哉彊勉之謂也 爾雅

釋文茂又作懋茂哉或作茂才 汝綸案王引之說

立政立事有政有事以政為長官事為羣職是也此

呼長官羣職而戒之戒庶官之詞

天聰明自我民聰明天明畏自我民明威 馬本畏作

威 鄭云言天所善惡與民同 段玉裁云考工記

注故書畏作威古威畏同音通用 孫星衍云聰明

謂視聽逸泰誓天視天聽是也明畏謂賞罰呂刑德畏德明是也民謂人

達于上下敬哉有土汝綸察達于上下自天子至於庶人也敬哉有土戒有邦之詞承上兢業乃幾天工人代分言之

朕言惠可底行 史記吾言底可行乎 汝綸察惠者詞之謂也說在堯典史公句下增乎釋惠義也問詞也蓋曰吾言謂可致行乎可底行史作底可行者底為致致至同字致可行可致行詞義同也

禹曰兪乃言底可績 史記禹曰女言致可績行 孫
星衍云績與迹同左傳復禹之績釋文本亦作迹王
逸楚詞注迹行也

皋陶曰予未有知 史記予作余

思曰贊贊襄哉 史記思贊道哉 蔡傳曰作曰 汝

綸案史以道詰襄襄與相同爾雅相道也上林賦襄
羊西京賦作相羊孔子弟子顏相字子襄是相襄聲
義并通贊道猶佐助也贊贊即贊言有長短耳

帝曰來禹汝亦昌言 史記帝舜謂禹曰汝亦昌言

禹拜曰都帝 史記禹拜曰於 汝綸案史記省帝字
予何言 王肅云帝在上皋陶陳謀于下已備矣我復
何所言

予思曰孜孜 史記予思曰孳孳

皋陶曰吁如何 史記皋陶難禹曰何謂孳孳

洪水滔天浩浩 史記鴻水滔天浩浩 汝綸案浩浩

屬上讀即堯典之浩浩滔天也

下民昏墊 史記下民皆服于水 孫星衍云廣雅墊

伏藏也文選注伏與服古字通 汝綸案昏與泯通

借爾雅泯盡也盡皆同義

予乘四載 史記予陸行乘車水行乘舟泥行乘橇山
行乘攢 河渠書陸行乘車水行載舟泥行蹈龜山
行即橋 孟康云橇形如箕攢行泥上徐廣曰橇直
轅車也

隨山刊木 史記行山槩木 說文槩槎識也讀若刊

段玉裁云槎衰斫也衰斫木使其白多以為道路高
下表識如孫子斫樹白書之類故曰槎識 夏本紀
述禹貢曰行山表木以表訓槩 孫星衍云廣雅隨

行也

暨益奏庶鮮食 史記與益予眾庶稻鮮食 又云令
益予眾庶稻可種卑濕 孫星衍云奏為予者鄭注
此經以奏為授授即予也 汝綸案周禮稻人掌稼
下地淮南子稻生於水是稻可種卑濕也馬注鮮生
也荀子禮論飯以生稻生稻即鮮也經但云鮮史公
問故于安國而知為稻也

予決九川距四海 史記以決九川致四海 孫星衍
云廣雅距至也至致聲相近 汝綸案廣雅以予也

史此文以讀已既事之詞

濬畎澮距川 史記浚畎澮致之川 汝綸案爾雅濬

深也詩傳浚深也一切經音義古文濬濬二形今作浚

暨稷播奏庶艱食 史記與稷子衆庶難得之食 汝

綸案播譚同字說文譚敷也詩傳敷猶徧也播奏者徧予也水未去惟稻易得他穀皆難得至是乃徧予之以高下皆可種也

鮮食懋遷有無化居烝民乃粒万邦作乂 史記食少

調有餘補不足徙居衆民乃定萬國為治 又云食
少調有餘相給以均諸侯 吳澄云伏生大傳作賀
遷 孫星衍云史讀居為著貨殖傳廢著鬻財 徐
廣曰著讀如貯漢書作居呂不韋傳奇貨可居 王
引之云立定也作粒者假借字周頌思文作立 汝
綸案懋讀為賀召誥眷命用懋與此同王融策秀才
文云賀遷通其有以正用此經李善注引書作賀史
以調釋賀遷者漢書王莽傳調都內故錢師古注調
謂發取之也史記化為徙者淮南原道注徙化也作

又訓為治作為皆語詞鄭周禮注作猶用也玉篇以
為也万邦作又万邦用又也万國為治万國以治也
皋陶曰兪師汝昌言 史記皋陶曰然此而美也 江
聲云而即女美即昌斯師聲近 汝綸案師與是斯
并同呂刑師聽五辭以師為斯莊子知北遊篇師故
以是非相釐也以師為是言者詞之云也詩疏以云
為助句辭顏氏家訓書證篇以也為助句之詞是云
猶也矣柯劭忞云言與焉通假詩眷言顧之荀子引
言作焉焉猶也

禹曰都帝慎乃在位帝曰俞禹曰 史記都作於無帝
曰俞禹曰五字 姚鼐云禹言万邦作乂蓋即繼以
慎乃在位安汝止言烝民之難安如此人君安忍肆
其上而不慎乎皋陶不待其言畢因嘆息其孳孳為
民曰師汝昌言帝亦一聞慎乃在位之言而即俞之
史因記于禹言之間實則禹言尙未盡也 汝綸案
姚說是史記省帝曰俞五字詞旨尤明凡皋謨中帝
曰皋陶曰禹曰其文多如此故史記往往省之左傳
魏絳言有窮后羿其詞未終即入悼公之言漢書霍

光傳讀詔未半即記太后之言皆此類也慎位安止
乃禹言之大歸若以万邦作乂為前辭已畢則但自
陳功伐於義何取乎

安汝止 史記安爾止 鄭云安汝之所止無妄動動
則擾民

惟幾惟康 史記無此四字 汝綸案樂書云君臣相
敕維是幾安即用此經夏本紀誤奪此四字耳爾雅
幾危也康安也惟幾惟康思危思安也

其弼直惟動不應 史記輔德天下大應 江聲云直

為惠之壞字 汝綸案史無其字王氏釋詞云其語
助無意義惟猶乃也輔德即左傳所云以德輔此也
上經戒妄動此言思危思安輔之以德乃動而天下
大應也

漢志以昭受上帝天其申命用休 史記清意以昭待
上帝命天其重命用休 汝綸案清讀為靜堯典直
哉惟清史記清作靜絜是其證廣雅志意也說文意
志也史公合靜待二字以釋此經之漢也昭受上帝
無命字則詞未終故史記增命字為句經省之者以

下句命字足成之也史記大宛傳大者數百小者百
餘人多者十餘少者五六輩皆上省一字下足成之
古人屬辭多此例也倉頡篇用以也左傳以禮承天
之休杜預注休福祿也

帝曰臣哉鄰哉鄰哉臣哉 史記帝曰吁臣哉臣哉
汝綸案史有吁字經脫漏也不言鄰哉者史省之鄰
猶輔也下經四鄰史記作四輔左傳倍其鄰者恥乎
杜預注鄰猶親也輔亦有親義荀子非十二子篇注
輔然相親附之兒

禹曰俞帝曰 史記無此五字 汝綸案此亦帝言未
終雜入禹言

臣作朕股肱耳目 舊傳言大體若身

予欲左右有民 舊傳左右助也 王引之云有語助
也如有家有邦有王有幼三有宅三有俊有虞有夏
有北有昊之類

汝翼 史記汝輔之

予欲宣力四方汝為 史記省此文 汝綸案爾雅宣
徧也詩箋力猶勤也為助也

予欲觀古人之象日月星辰山龍華蟲作會宗彝藻火
粉米黼黻絺繡以五采彰施于五色作服汝明 史記

余欲觀古人之象日月星辰作文繡服色女明之

大傳天子衣服其文華蟲作績宗彝藻火山龍諸侯
作績宗彝藻火山龍子男宗彝藻火山龍大夫藻火
山龍士山龍故書曰天命有德五服五章哉山龍青
也華蟲黃也作績黑也宗彝白也藻火赤也天子服
五諸侯服四次國服三大夫服二士服一 說文彝
从糸系綦也璵玉飾如水藻之文也黼畫粉也从黹

从粉省衛宏說紕繡文如聚細米也黼白與黑相次
文黻黑與青相次文繡五采備 鄭云性曰采施曰
色 孫星衍云大傳不言粉米黼黻紕繡者以黼黻
粉米為刺繡之文衣裳并用之惟衣有山龍以下五
章裳則粉米黼黻紕繡而已史公說自山龍至藻火
則謂之文說文文錯畫也是文即畫自粉米已下既
刺于紕皆謂之繡義與大傳同也大傳作繪為黑者
說文黼淺黑色又嬪女黑色也是繪音義當為黑
汝綸案史記以象日月星辰為句言象天文而為文

繡不以日月星辰為服章也象日月星辰即堯典欽
若之事古人蓋謂堯也今欲效之以為服廣雅觀視
也視效也是觀有效義許氏說文序以古人之象為
句馬鄭并以三辰為章皆失其讀也五章大傳說是
粉米黼黻刺為繡者天子至士皆同之不為章惟其
畫山龍等五文者為章耳大傳言次國又言子男者
以後世之爵稱之唐虞無此爵也作繪為一章則作
乃標識之字猶歲名之有作噩也藻火為一章陳祥
道據鄭說二章以駁大傳非也隋書禮儀志虞世基

秦近代故實依尚書大傳以作繪宗彝純黑藻純白
火純赤此六朝人不知作繪為章而誤合宗彝又依
鄭氏分藻火為二非大傳本然也山龍等五章至舜
始有皋陶所言五服五章則先時天子至士必有章
服之等要不必與舜同大傳引後以證前耳非先有
此五章舜又欲作之也鄭謂十二章非是周之冕服
極于至文尚止九章虞何有十二章邪彰施者明施
也汝明者汝成之也

予欲聞六律五聲八音在治忽以出納五言汝聽 史

記在治忽作來始滑徐廣曰尚書滑字作留索隱云
今文作采政忽 漢書律曆志書曰予欲聞六律五
五聲八音七始訓以出內五言女聽予者舜也言以
律呂和五聲施之八音合之成樂七始者天地四時
人之始也順以歌詠五常之言聽之則順乎天地序
乎四時應人倫本陰陽原情性風之以德感之以樂
莫不同乎一唯聖人為能同天下之意故帝舜欲聞
之也 鄭大傳注引欲聞作欲同 段玉裁云訓今
本作詠誤也隋志作訓孟堅以順釋訓訓忽于音韻

同類七始即七政大玄運諸泰政王莽候鉦銘重五十黍斤楊用脩言史記來乃黍之誤是也七始石經蓋作黍政故小司馬仍為采政 汝綸案聞當依大傳注作同律厯志云莫不同乎一唯聖人為能同天下之意此釋經之同也隋志云書稱同律度量衡又曰予欲聞六律五聲八音七始則聞亦當作同承上同律度量衡為義今史記漢書隋書白虎通并作聞者皆後人依誤本尚書改之夏小正雷不必同今本大戴作雷不必聞聞同字形易亂也廣雅聽謀也汝

聽者汝謀之也

予違汝弼汝無面從退有後言 史記予即辟女匡拂
予女無面諛退而謗予 孫星衍云說文弼古文營
營拂同音從為諛者漢書汲黯傳從諛承意從與諛
義相近

欽四鄰 史記敬四輔臣 大傳古者天子必有四鄰
前曰疑後曰丞左曰輔右曰弼 汝綸案鄰為輔者
淮南精神篇注鄰比也易衆傳比輔也幽通賦亦以
德而助信以德謂輔德也

庶頑讒說 史記諸衆讒嬖臣 孫星衍云史以頑為
衆者鄭語非親即頑謂非親戚即衆人也頑以元為
聲元元即衆民也

若不在時候以明之撻以記之書用識哉欲并生哉工
以納言時而颺之格則承之庸之否則威之 說文達
古文撻蔡傳格讀如有恥且格之格 史記君德誠
施皆清矣 汝綸案此史記約尙書為文也王氏釋
詞若猶或也爾雅時善也言諸衆讒嬖臣或有不在
于善者則有侯撻諸事皆所謂施君德也清讀為靖

韓詩靖善也格者為善威之亦使從善故曰皆清也
漢書律厯志應劭注生者治也並生者並治也工與
公通借工以納言者以大公之心聽言也時而賜之
者善乃揚之也承讀丞民于農桑之丞馬易注承舉
也 又案臧和貴以此經為後人增句竊謂侯以明
之以下史記所無文辭不能與漢或漢時書說而後
人誤合于經下海隅蒼生共惟帝臣及此否則字皆
非尚書文法無逸否則皆讀不則與此不同也疑古
經至若不在時句止若順也不否也時是也若否

在時猶邇可遠在茲故史公釋為君德誠施皆清也

禹曰俞哉 史記禹曰然

帝光天之下至于海隅蒼生万邦黎獻共惟帝臣惟帝時舉敷納以言明庶以功車服以庸誰敢不讓敢不敬應 史記無此四十三字 左傳敷作賦庶作試漢書作傳納東京賦共作具 王符潛夫論云辭言應對各緣其文以覈其實則奉職不解而陳言者不得誣矣 段玉裁云孔宙碑黎儀以康黎儀即黎獻大誥

民獻王莽傳作民儀廣雅儀賢也 孫星衍云史岑
出師頌蒼生更始李善注蒼生黔首也 汝綸案惟
願也解在召詒舜意重四輔而寬讒嬖禹不謂然故
言惟在善舉重擇人也此經并史記所無疑亦漢經
師所記其文氣與上下有辨

帝不時敷同日奏罔功 史記帝即不時布同善惡則
毋功 汝綸案時敷者善分也史記敷作布者禹貢
敷土山海經作布土馬禹貢注敷分也郭璞云布分
也同日奏謂善惡同時并進故云同善惡也

帝曰無若丹朱傲 史記有帝曰今尙書無 說文虞
書曰若丹朱寡讀若傲論語寡盪舟 江聲云劉向
上奏曰帝戒伯禹曰毋若丹朱敖論衡亦云帝舜敕
禹然則漢人所傳尙書皆有此帝曰及下禹曰孺
汝綸案劉向以為戒禹非也下所陳諸行中人所無
而以戒禹擬不於倫矣說文以若丹朱寡為句是讀
自毋字絕之毋與惡亾并同趙岐孟子注惡不安事
之歎辭也莊子作亾此經言雖施德若丹朱寡所為
予亦不能順之答禹同善惡之言也許君此讀過于

子政矣舊以傲為傲德非也敖虐方見後文此不宜
複兩漢刊誤補遺云丹朱敖是兩人皋盪舟即网水
行舟愚謂下所言乃一人之事若本言兩人豈得辭
不別白說文引丹朱皋繼以皋盪舟是明以論語之
皋為即虞書之丹朱皋然則丹朱皋是一人矣但非
堯子耳管子宙合篇若敖之在堯也莊子齊物論人
間世皆言胥敖胥敖即朱敖也呂覽名類篇堯戰于
丹水之浦以服南蠻即莊子堯欲伐宗膾胥敖南面
而不釋然之事蓋胥敖與宗膾俱在丹水之浦故曰

丹朱敖丹朱敖即楚詞之澆離騷澆身被服強圉今縱欲而不忍曰康娛以淫遊兮厥首用夫顛隕即此經嫚遊敖虐用殄厥世也天問釋舟陵行何以遷之惟澆在戶何求于嫂即此經罔水行舟朋淫于家也澆楚詞一作梟王逸引論語澆盪舟知敖澆胥敖丹朱梟為一人矣若丹朱故君之子縱有敗德豈宜訟言廷辱况下言虞賓在位方與羣后揖讓邪史記五帝紀云丹朱商均皆有曷土以奉先祀服其服禮樂如之以容見天子豈有殄世之事吾斷謂此丹朱梟

非堯子也

惟慢遊是好傲虐是作 史記無下四字

罔晝夜頔頔 史記省此文 潛夫論頔頔作鄂鄂

汝綸案釋名頔鄂也鄂頔同聲通訓鄂猶吾吾吾
吾猶語語廣雅語語喜也選倍同字故鄂通吾語晉
語暇豫之吾吾即此鄂鄂也頔頔又為高義西京賦
鍔鍔列列注皆高兒韓愈平淮西碑頔頔蔡城猶鍔
鍔也

罔水行舟 史記毋水行舟

朋淫于家 說文朋作朋 朱彬云朋讀如馬牛其風
之風後漢孝明八王傳安帝詔云風淫于家是朋與
風同 孫星衍云風放也 馬其昶云朋為侈之借
字

用殄厥世 史記用絕其世 汝綸案倉頡篇用以也
予創若時 史記予不能順是 舊傳創懲也 汝綸
案漢書馮奉世傳羌虜破散創艾即懲刈也

禹曰予娶塗山辛壬癸甲啓呱呱而泣 史記禹曰予
辛壬娶塗山癸甲生啓 論衡禹曰予娶若時 說

文僉會稽山也一曰九江當僉也民俗以辛壬癸甲
之日嫁娶从岫余聲虞書曰予娶僉山 汝綸案論
衡若時二字乃僉山二字之誤當據說文校改段孫
均謂論衡以創為娶非是據史記當以辛壬上屬為
句癸甲下屬為句辛壬娶僉山者娶二日而往治水
也癸甲生啓者生子二日而往治水也此非一時事
呂覽謂自辛壬至甲四日復往治水如此則言辛甲
可矣何用連及壬癸耶列女傳云既生啓辛壬癸甲
啓呱呱而注亦誤皆緣辛壬癸甲四日相連遂併為

一時故各據一說而皆不能通

予弗子 史記予不子 釋文子鄭將吏反

惟荒度土功 史記以故能成水土功 孫星衍云詩
傳荒大也廣雅度就也就亦成也 汝綸案王氏釋
詞惟猶以也李善甘泉賦注惟是也惟有是以之義
故史釋為以故也舊傳亦用以故二字釋惟經土功
上疑奪水字傳疏皆有

弼成五服至于五千 史記輔成五服至于五千里
說文弼作邶五經異義歐陽夏侯說中國方五千里

汝綸案史公說禹貢云天子之國以外五百里甸
服甸服外五百里侯服侯服外五百里綏服綏服外
五百里要服要服外五百里荒服是五服相距五千
里歐陽夏侯說是也許慎以漢地考之自黑水至東
海衡山之陽至于朔方經畧万里從古尙書五服相
距万里之說明與禹貢經言五百里者不合蓋九州
疆域實兼此文五服四海言之今但以五服當九州
宜其誤也玉篇以邶為古文弼字五服是時始置大
傳云夏成五服又言禹成五服是其證云輔成者謂

輔天子而成之也鄭以五服之外又有五服之粥其
說迂矣又此五服即禹貢五服追述前事耳鄭謂堯
制五服服各五百里禹又粥成為万里其說堯禹五
服各異亦誤

州十有二師 史記州十二師 汝綸案大傳云八家
為鄰三鄰為朋三朋為里五里為邑十邑為都十都
為師州十有二師焉鄭注州凡四十三万二千家此
蓋唐虞之數也據此則師者十都之名也鄭此經注
以諸侯賢者為之師非是

外薄四海咸建五長 孔疏釋地云九夷八狄七戎六蠻謂之四海王制云五國以為屬屬有長此建五長亦如彼文 孫星衍云廣雅薄至也詩箋引此經薄本作敷敷薄聲相近 汝綸案四海在九州之內幽都崇山三危羽山均在九州內史記云變北狄南蠻西戎東夷此四海在九州境內之證明堂位夷蠻戎狄皆有朝位而四塞則世告至鄭以四塞為夷鎮蕃夷蠻戎狄近于四塞當在周之要服鄭尙書注要服在九州之內然則詩箋謂四海國在九州之外者非

矣爾雅四極四荒四海乃自達而近李巡謂四海達于四荒亦非周世所云禹跡皆兼五服四海為言乃足盡九州疆域也王制言四海之內九州者四海邊徼即九州邊徼非謂九州在四海內也彼文固謂四海之內方三千里東西南北不盡流沙東海衡山恒山矣

各迪有功苗頑弗即工 史記各道有工苗頑不即工汝綸案趙注孟子云為有也有為同義功工皆攻之借字爾雅攻善也苗頑苗衆也頑如庶頑之頑言

五服四海各導之為善而苗衆獨不就善也此經在
遷苗後言此者論衡所謂陳已行事以往推來以見
卜隱也禹蓋言不獨丹朱梟也自水土平後九州承
化矣苗衆乃不用命然則君德雖施豈能遽清乎申
上分善惡之愷也

迪朕德時乃功惟叙 史記道吾德乃女功序之也

孫星衍云韋昭晉語注道達也魯語注序次也 汝
綸案韓詩章句惟辭也叙序皆順也

皋陶方祗厥叙方施象刑 史記皋陶于是敬禹之德

令民皆則禹不如言刑從之 白虎通方施作旁施
大傳唐虞之象刑上刑赭衣不純中刑雜屨下刑
墨幪以居州里而反于禮 汝綸案上方史以於是
釋之下方讀為旁漢武帝詔云昔在唐虞畫象而民
不犯謂此象刑也與象以典刑之象異解畫象若鑄
鼎象物民不犯故無肉刑非不用刑止用畫也

惟明 史記舜德大明

夔曰戛擊鳴球搏拊琴瑟以詠 史記於是夔行樂
楊雄長楊賦拊隔鳴球韋昭云古文隔為擊 鄭云

戛櫟也櫟擊此四器也鳴球即玉磬也搏拊以韋為之裝之以稊所以節樂以詠謂歌詩也 段云戛擊即明堂位之楷擊如秸楷韎三形同字之比鄭彼注楷擊謂祝歌 孫星衍云釋詁爰曰也曹大家幽通賦注爰于是也 史公以夔曰至鳳皇來儀為虞史之言故說曰為於是是此曰當訓爰也

祖考來格 史記祖考至 大傳格作假

虞賓在位 史記省此文 白虎通云不臣二王之後者尊先王通天下之三統也尚書曰虞賓在位謂丹

朱也 孫星衍云堯本紀丹朱商均皆以客見天子
天子弗臣

羣后德讓 史記羣后相讓 汝綸案史不釋德字易
與文為常語也

下管鼗鼓合止祝敵 史記省此文 白虎通鼗作鞀
鄭云已上皆宗廟堂上之樂下管鼗鼓已下謂舜
廟堂下之樂祝狀如漆箛中有椎搖之以節樂合之
者投椎於其中而撞之敵狀如伏虎背有刻以物樂
之所以止樂

笙鏞以間 史記省此文 周禮注鏞作庸 鄭云笙
庸以間者東方之樂謂之笙笙生也東方生長之方
故名樂為笙也西方之樂謂之庸庸功也西方物熟
有成功亦謂之頌頌亦是頌其成也以間者堂上堂
下間代而作庸即大射頌 段玉裁云尙書笙庸兼
阼階之笙磬笙鐘西階之頌磬頌鐘言之衛包依孔
訓改為鏞

鳥獸蹌蹌 史記鳥獸翔舞 鄭云蹌蹌然而舞也
汝綸案翔蹌以聲訓也

簫韶九成鳳皇來儀 史記五帝紀於是禹乃興九招
之樂致異物鳳皇來翔天下明德皆自虞舜始 鄭
云簫韶舜所制樂宋均注樂說云簫之言肅舜時民
樂其肅敬共紹堯道故謂之簫韶或云韶舜樂名舞
舜樂者其秉簫乎樂備作謂之成成猶終也每曲一
終必變更奏云簫韶九成鳳皇來儀者若樂九變人
鬼可得而禮故致得來儀乘匹 蔡傳簫古文作箛
舞者所執 汝綸案說文竹部云虞舜樂曰箛韶其
音部引此經作簫者箛為古文簫則經師之所讀也

簫韶舜樂史記說為禹興者如武為武王之樂亦是
周公所作夏本紀云禹聲為律身為度稱以出又云
天下皆宗禹之明度數聲樂為山川神主上經舜欲
同聲律出入五言固命禹謀之故禹承命而興九招
也史記儀作翔者漢書外戚傳晉灼注儀何也何翔
聲義俱近姚永樸云廣雅釋詁儀見也

夔曰於予擊石拊石 史記省此文 汝綸案經於鳳
皇來儀即類記百獸率舞特用夔言證之故史記節
省此經以便文也

庶尹允諧 史記百官信諧 汝綸案信語詞五帝紀
天下明德是釋此經之義也說苑亦云禹乃興九招
之樂致異物鳳皇來翔天下明德

帝庸作歌 史記帝用此作歌

曰勅天之命惟時惟幾 史記陟天之命維時維幾

汝綸案鄭周禮注陟之言得也言得天之命惟是為
危也是者即斥天命也此自言其作歌之意柯劭忒
云勅陟雙聲字此以聲為義爾雅勅訓勞陟訓成義
亦相通

乃歌曰股肱喜哉元首起哉百工熙哉 大傳元首君也股肱臣也 江聲云周禮注故書功為工功事也 王引之云喜起熙皆興也禮疏引爾雅歡喜興也 今爾雅廡熙興也是喜熙皆有興義

颺言曰 史記揚言曰 孫星衍云釋詁揚續也揚與颺同

率作興事 史記率為興事 汝綸案小爾雅率勸也 呂覽審時篇注興昌也劉逵蜀都賦注昌慶也率作興事猶孔惺鼎銘之作率慶士鄭云慶士善事也

慎乃憲欽哉 史記慎乃憲敬哉 舊傳憲法也 孔
疏憲法釋詁文

屢省乃成欽哉 史記省此文 汝綸案鄭中庸注曰
省月試考校其成功也屢省乃成數考其成也史記
似誤脫之

乃賡載歌曰 史記乃更為歌曰 孫星衍云晉語性
利相更注更續也釋詁載偽也偽與為通

元首明哉股肱良哉庶事康哉 江聲云左傳服虔注
良能也 汝綸案釋名康昌也又韓康孟康皆字休

康哉猶休哉也

元首叢脞哉 舊傳細碎無大畧

股肱惰哉 万事墮哉 史記樂書云股肱不良 万事墮壞 孫星衍云方言墮壞也

帝拜曰 俞往欽哉 史記於是天下皆宗禹之明度數 聲樂為山川神主

禹貢

史記當帝堯之時 鴻水滔天 堯聽四嶽用鯀治水 九年而水不息 舜登用攝行天子之政 巡狩行視鯀之

治水無狀乃殛鯀于羽山以死於是舜舉鯀子禹而
使續鯀之業堯崩帝舜問四嶽曰有能成堯之事
者使居官皆曰伯禹為司空可成堯之功舜曰嗟
然命禹汝平水土維是勉之禹拜稽首讓契后稷皋
陶舜曰女其往視爾事矣禹乃遂與益后稷奉帝命
命諸侯百姓興人徒以傅土行山表木定高山大川
禹傷先人父鯀功之不成受誅乃勞身焦思居外十
三年過家門不敢入陸行乘車水行乘船泥行乘橇
山行乘橰以開九州通九道陂九澤度九山令益子

衆庶穡可種年濕命后稷予衆庶難得之食食少調
有餘相給以均諸侯禹乃行相地宜所有以貢及山
川之便利 漢地理志堯遭洪水褒山襄陵天下分
絕為十二州使禹治之水土既平更制九州列五服
任土作貢 汝綸案史記禹傳土在舜時舊傳以為
堯時非也漢志堯遭洪水使禹治之者據舜初舉禹
時言之其水土既平更制九州列五服則在舜時也
禹敷土 史記禹傳土 索隱大戴禮作傳土 汝綸
案敷傳通借廣雅傳治也

隨山刊木 史記行山表木 漢志刊作栳 高誘淮
南注隨循也栳木刊識之 孫星衍云廣雅隨行也
韋昭周語注古者列樹以表道說文栳槎識也槎識
者斫木為識即表道也

奠高山大川 史記定高山大川 蔡傳云以別州境
江聲云周禮賈注奠讀為定

冀州 史記禹行自冀州始 鄭云不書其界者時帝
都之使若廣大然

既載壺口 漢志河東郡北屈古州 禹貢壺口山在東

南

柯劭忞云據楊秋湄校東南當作西南

鄭云載之言事事謂作徒

役

治梁及岐

漢志左馮翊夏陽

韓城西南

禹貢梁山在西北

右扶風美陽

扶風北

禹貢岐山在西北

鄭云於此言

治梁及岐者蓋治水從下起以襄水害易也

既脩太原

鄭云於地理志太原今以為郡名

府今

孫

星衍云廣雅脩治也

至于岳陽

史記岳作嶽漢志同

漢志河東郡彘州

霍州

西

霍太山在東冀州山

鄭云岳陽太岳之南太岳

名霍太山 汝綸案漢志云某州山川不言禹貢者
皆說職方之文也

覃懷底績 史記覃懷致功 鄭云懷縣武陟西屬河內

孔䟽蓋覃懷二字共為一地

至于衡漳 漢志漳作章 漢志上黨長子今縣西鹿谷

山濁漳水所出東至鄴彰德府入清漳沾縣樂平縣大要

谷清漳水所出東北至昌依王鳴盛校城今阜城縣入大河

過郡五行千六百八十里冀州川信都國信都冀州王

都故章河在北東入海 鄭云衡漳者漳水橫流入

河 汝綸案漢志信都故章河東入海海疑河字之
誤蓋至阜城入河者班時漳水見行道也由信都而
東入河者漳水故道也漢時大河過鬲脩今德景二
州地在冀州東也

厥土惟白壤厥賦惟上上錯厥田惟中中 史記其土
白壤賦上下錯田中中 馬云壤天性和美也 鄭
云田著高下之等者當為水害備也 舊傳上上第
一錯雜也雜出第二之賦 汝綸案馬云地有上下
相雜通率弟一九九等者皆據通率為言此獨言錯

知錯出別等馬義非也顏監謂錯出諸品亦非疏引顧氏云上上之下即次上中其說是也

恒衛既從 史記常衛既從 漢志常山郡上曲陽今縣

恒山北谷 王念孫校改代谷 在西北有祠并州山禹貢恒水

所出東入滹代郡靈邱今縣滹河東至文安今縣入大河

過郡五行九百四十里并州川常山郡靈壽今縣禹貢

衛水出東北東入虋池代郡鹵城東繁時虋池河東至

參戶 齊召南校改參台今青縣西入虋泥別過郡九行千三百四

十里并州川河間國樂成縣虋池別水首受虋池河

東至東兗

縣今

入虜池河弓高

阜城西南

虜池別河首受虜

池河東至平舒

陳澧云平舒上脫東字今靜海

入海勃海郡成平河

虜池河民曰徒駭河信都國信都

冀州

故虜池在北東

入海

胡渭云恒即涿衛即虜池古今異名耳

汝

綸案鄭樂記注從順也恒衛源短涿與虜池奪其故

名虜池斷續難考故備錄漢志成平虜沱為徒駭者

許商之說也信都故虜池東入海海字亦當為河字

之誤鹵城有從河至文安入海者當別是一河與虜

沱不相蒙也

大陸既作 史記大陸既為 漢志鉅鹿郡鉅鹿今禹縣

貢大陸澤在北 汝綸案高誘呂覽注為治也

鳥夷皮服 史記鳥夷皮服 漢志同 舊傳海曲謂

之鳥 集韻鳥古作鳥 汝綸案舊傳讀鳥為鳥是

也北鳥夷故皮服南鳥媛故卉服其字則當為鳥

夾右碣石入于河 史記河作海 漢志漁陽郡驪成

撫甯大碣石山在縣西南遼西郡樂亭有碣石水南入

官 水經注河之入海舊在碣石漢司空王瓚言往

者海水溢西南出侵數百里故張君云碣石在海中

汝綸案張君張揖也夾者𨇗之借字漢書趙充國
傳四望𨇗中注云山峭而夾水曰𨇗儀禮寢右鄭注
右首也夾右者𨇗首也𨇗首者𨇗口也王逸楚詞注
夏首夏水口也𨇗口即上林賦所云隘𨇗之口也此
記爲夷入中國之道有𨇗首碣石入河也史記河作
海者轉寫誤也

濟河惟兗州 史記濟河維沅州 漢志濟作沛 鄭
云言沅州之界在此兩河之間 汝綸案玉篇惟爲
也

九河既道

漢志勃海郡成平

獻縣東南

虡池河民曰徒駭

東光

今縣

有胡蘇亭

在今滄州

平原郡虡

德州北

平當以為虡

津

海泄志許商云古九河之名有徒駭胡蘇虡津

今見在成平東光虡界中自虡以北至徒駭間相去

二百餘里今河雖數移徙不離此域 鄭云河水自

上至此流盛而地平無岸故能分為九以衰其勢壅

塞故通利之也九河之名徒駭太史馬頰覆釜胡蘇

簡潔鈎盤鬲津周時齊桓公塞之同為一今河間已

高

阜城西南

以東至平原虡往往有其遺處焉

王引之

云道通也法言道也者通也

雷夏既澤

漢志濟陰郡成陽

荷澤東北

禹貢雷澤在西北

蔡傳澤水之鍾也

澠沮會同

史記澠作雍

漢志同

鄭云雍水沮水

相觸而入此澤中

司馬貞云爾雅水自河出為雍

也

蔡傳晁氏曰爾雅水自河出為澠濟出為澠沮

有澠音二水河濟之別也

汝綸案水經注濮陽有

沮丘城六國時沮楚同音以為楚丘據此則沮即爾

雅之澠晁說是也澠自濟出蓋即水經注之北濟濮

渠也酈元以瓠子河為雍瓠子過廩邱為濮水蓋二水舊合于雷澤矣括地志因鄭注而為說不足據也桑土既蠶孔疏宜桑之土既得桑養蠶

是降丘宅土史記於是民得下丘居士王引之云是猶於是也詩是刈是穫正義於是刈取之於是穫煮之

厥土黑墳厥草惟繇厥木惟條厥田惟中下厥賦貞作十有三載乃同史記其土黑墳草繇木條田中下賦貞作十有三年乃同漢志其土作厥土餘同史記

說文繇作繇馬鄭載作年 馬云墳有膏肥也

舊傳繇茂條長也州第九賦與九相當治水十三年
乃有賦法與他州同 孫星衍云周禮草人注云墳
壤潤墳肥一聲之轉故漢書地理志墳壤應劭讀墳
為肥三倉解詁臍臍多汁也墳音近臍 汝綸案說
文繇草盛兒舊傳訓茂是也馬注洛誥我二人共貞
云貞當也舊傳州第九賦與州相當蓋漢人舊說九
州等第今無可考孔疏以治水後畢言之未必然也
知舊傳為漢人說者彼不知貞有當義而釋貞為正

故知非其自撰也鄭以正作連文非是但稱正作何以知為下下哉史記云禹勞身焦思居外十三年河渠書引夏書曰禹抑洪水十三年孟子亦云禹八年於外三過其門馬注十三年并縣九年數之非是史記禹治水土在堯崩後馬謂兗州平在受終之年亦非

厥貢漆絲厥篚織文 史記厥作其漢志篚作棐 鄭云貢者百工之府受而藏之其實于篚者入于女功故以貢篚別之膚征云篚厥乎黃昭我周王 孔疏

筐之所盛皆供衣服之用漢世陳留襄邑縣置服官
孫星衍云說文錦襄邑織文也水經注引陳留風
俗傳曰襄邑縣南有渙水故傳曰睢渙之間出文章
天子郊廟御服出焉尚書所謂厥筐織文者也汝
綸案睢渙在豫州與濟相近風俗大同故陳留風俗
傳引此證之不以襄邑為充域也

浮于濟漂達于河 史記浮於濟漂通於河漢志濟作

沛

漢志東郡東武陽

城

禹治漂水東北至于乘

高苑

縣

入海過郡三行千二百里平原郡高唐

今

桑欽言

漯水所出 孟康云禹所二渠其出貝邱

清平

西南南

折者即河之經流也其一則漯川也 汝綸案漢志

載桑欽言漯水廣異說也故鄭及酈元并不從之每
州皆紀水道史記云禹行相地宜所有以貢及山川
之便利然史公此言乃摠括禹貢大指非釋諸州水
道之文鄭云治水既畢更復行之觀地肥瘠定貢賦
高下殆亦未是觀每州皆汭流至河則時瀾輯呂氏
書說以為九州漕運之道是也林之奇兼商賈轉輸
為言義雖近然此書以貢名篇紀貢道而義自備

也

海岱惟青州 漢志泰山郡博安泰岱山在西北 鄭云

東自海西至岱東嶽曰岱山

嶠夷既畧 司馬貞云今文尚書及帝命驗並作禺鐵

鐵古夷字也 孫星衍云說文鐵古文从夷蓋緩讀

之即夷聲矣 王引之云廣雅畧治也

維淄其道 史記維淄既道 漢志作惟淄 漢志瑯

琊郡箕莒州禹貢維水北至都昌昌邑入海過郡三行

五百二十里兗州寔也泰山郡萊蕪今縣原山淄水所

出東至博昌

博興

入涿

汝綸案史記其為既者詩徐

方既來荀子作徐方其來是其既同也

厥土白墳海濱廣斥

史記其土白墳海濱廣濶厥田

斥鹵

徐廣曰濶一作澤又作斥

鄭云斥謂地鹹

鹵王念孫云史記厥田斥鹵四字後人所加孫

星衍云河渠書既澤鹵之地索隱澤一作鰯文選海

賦注斥為鰯古今字也澤斥鰯三字通

厥田惟上下厥賦中上史記田上下賦中上

厥貢鹽絺海物惟錯鄭云海物海魚也魚種類尤雜

岱畎絲枲鉛松怪石 舊傳畎谷也岱山之谷出此五物皆貢之釋文畎徐作畎

萊夷作牧 史記萊夷為牧 汝綸案牧讀如左傳牧隰皋之牧為牧猶言以牧水去而萊夷之地於以井牧也詩傳作始也

厥篚檿絲 史記其篚會絲 司馬貞云爾雅檿山桑是蠶食檿之絲也 段玉裁云檿作會者古二字同音如毛詩慝慝韓詩作愔愔也

浮于汶達于濟 史記浮於汶通於濟 漢志泰山郡

萊蕪今縣原山禹貢汶水出西南入洸汶水蔡欽所言

琅琊郡朱虛臨朐東南東泰山汶水所出東至安邱今縣入

淮汝綸案班記蔡說汶水備異解班不從之以萊

蕪之汶在徐此記青州水道宜是朱虛之汶也達于

洸汶不通洸當由陸達之猶史記褒絕水至斜間百

餘里以車轉者是也汶不通洸猶兗州浮洸達河洸

不通河也

海岱及淮惟徐州鄭云徐州界又南至淮水

淮沂其乂史記淮沂其治漢志泰山郡蓋沂水沂西北

水南至下邳

邳州

入泗過郡五行六百里

蒙羽其藝

漢志泰山郡蒙陰

縣今

禹貢蒙山在西南有

祠東海郡祝其

海州

禹貢羽山在南縣所殛

孫星衍

云廣雅藝治也

大野既豬

史記大野既都

漢志山陽郡鉅野

縣今大

壑澤在北兗州數

江聲云禮記檀弓注豬都也南

方謂都為豬

東原底平

鄭云今東平郡

州今

即東原

厥土赤埴墳

史記厥作其鄭本埴作戢讀曰熾云熾

赤也謝沈注戢音志 孔䟽戢埴音義同 段玉裁
云鄭以赤熾言色埴言性戢訓黏則與埴為二性非
經之例晉成公綏天地賦云海岱赤城華梁青黎左
思蜀都賦丹沙赭熾出其坂皆用鄭讀

草木漸包 說文作草木蘄苞 馬云漸包相包裹也
段玉裁云蘄苞稹緻之兒

厥田惟上中厥賦中中 史記其田上中賦中中

厥貢惟土五色 史記貢維土五色 汝綸案鄭以土
五色為大社之封非也史記封禪書禹興而脩社祀

立太社當是祀社後始有之大社五土見于周書作
維蕭唐虞無有也貢土五色蓋備丹雘塗塹之用上
林賦其土則丹青赭堊雌黃白垺錫碧金銀衆色炫
耀照爛龍鱗張衡南都賦亦以赭堊流黃青雘丹粟
為寶利珍怪是土不為立社貢也

羽畎夏翟

漢志翟作狄

鄭周禮注作羽畎夏狄

鄭云羽山之谷貢夏翟之羽

段玉裁云古翟狄相

假借廣雅狄羽也

汝綸案舊傳夏翟翟雉名行一

翟字孔疏夏翟共為雉名是其證鄭染人注云夏狄

是其總名其類有六亦以夏狄為雉也染人注染夏者染五色巾車孤乘夏蒙鄭注五采畫轂約也是夏為五色故周宮有夏采夏翟者五色羽也鄭司農訓夏為赤者爾雅夏為朱明故云赤也

嶧陽孤桐 漢志東海郡下邳 州葛嶧山在西古文以

為嶧陽 舊傳孤特也嶧山之陽特生桐中琴瑟

汝綸案特生桐謂桐之特生者

泗濱浮磬 漢志齊陰郡乘氏 野 鉅泗水東至睢陵 盱入

淮過郡六行一千一百一十里 水經注泗水過呂

縣南水上有石梁故曰呂梁

在徐州府東南

晉太康地記曰

水出磬石書所謂泗濱浮磬也胡渭云磬即石嶧山
頌云刻此樂石樂石即磬

淮夷蠙珠

史記索隱蠙一作玼

說文蠙夏書玼字

也鄭云淮夷淮水之上夷民也段玉裁云說文

玼玼珠也宋宏云淮水中出玼珠玼珠之有聲玼

珠之有聲五字當作玼蚌之有聲者六字韋昭云玼

蚌也山海經鰐魈之魚其狀如覆鮑鳥首而翼魚尾

音如磬石之聲是生珠玉江賦所謂文魮磬鳴也玼

蚌蓋類是能鳴故曰蚌之有聲者

暨魚 史記泉魚漢志同 司馬貞云泉古暨字泉與

也

厥篚玄纁縞 曾攸云玄也纁也縞也九三物 汝綸

案三者皆以色言詩傳玄黑而有赤也鄭禮注白經
赤緯曰縞黑經白緯曰纁篚玄纁縞猶言篚厥玄黃
皆縞也後漢張衡傳注玄黃謂縞綺也顏監此注纁
細縞也司馬彪子虛賦注縞細縞也

達于河 史記通於河 說文河作荷水經注同 汝

綸案史記漢書並作河河者荷之借字釋文河音如
字者荷通作荷春秋說題辭河之言荷也是河荷荷
三字並通不必改讀釋文言水出山陽湖陵魚臺東其
不以為大河明矣

淮海惟揚州 鄭云揚州界自淮而至海以東也

彭蠡既豬 史記彭蠡既都 漢志豫章郡彭澤都昌北

禹貢彭蠡澤在西

陽鳥攸居 史記陽鳥所居 鄭云陽鳥鴻雁之屬隨

陽南北 汝綸案高誘淮南注以候雁來為南之彭

蠡則彭蠡為陽鳥所居亦如山海經所云雁門山矣
林之奇以陽鳥為地名者臆說也楊雄州箴亦云陽
鳥攸處與史記說同此經畧如詩之興象因彭蠡而
及之不關治水之績所謂文外曲致也

三江既入

漢志會稽郡毗陵

丹徒鎮

北

胡渭依宋本校增

江在

北東入海楊州川吳

今縣

南江在南東入海楊州川丹

陽郡蕪湖

今縣

中江出西南東至陽羨

宜興

入海楊州川

鄭云三江分於彭蠡為三孔東入海

姚鼐云鄭

本地志言江自彭蠡而下始流為三徐堅初學記不

知得誰氏之說以彭蠡為南江岷江為中江漢為北江與疏所引鄭注絕相背此豈康成言哉 汝綸案初學記所引稱鄭玄孔安國注此必徐邈等所為尙書音之說隋志云尙書音五卷孔安國鄭玄李軌徐邈等撰當徐堅時鄭注雖廢其書尙存無緣偽託惟尙書音雜揉數人之說故致淆亂耳又鄭注三江分於彭蠡為句為三孔東入海為句三孔猶三瀆即班志中江出蕪湖分江水首受江于石城之說非彭蠡有三孔也

震澤底定 史記震澤致定索隱震一作振 漢志會

稽吳縣今具區澤在西揚州數古文以為震澤

篠簜既敷 史記竹箭既布 鄭云筱箭簜大竹也

陳壽祺云竹箭如便在伏物曰柳谷之異文說文槽
晉聲書曰竹箭如槽蓋節引禹貢之辭與紕讀若禹
貢玼珠為一例儀禮大射儀古文箭為晉周禮職方
注箭筱也故書箭為晉古箭晉同音

厥草惟夭厥木惟喬 史記厥作其 馬云天長也

舊傳喬高也 孔疏喬高釋詁文

厥土惟塗泥厥田惟下下厥賦下上上錯 史記其土
塗泥田下下賦下上上雜 馬云塗泥漸洳也 舊
傳賦第七雜出第六 汝綸案史記錯為雜者詩傳
錯雜也

厥貢惟金三品 舊傳金銀銅也 汝綸案詩泮水疏
引鄭注金三品者銅三色也銅上脫金銀二字禮器
疏云荆揚二州貢金三品者禹貢文鄭注以為金銀
銅三品者三色也近儒據誤本詩疏以為於銅之中
又分三色古不如是纖瑣也史記平準書有司言古

者金有三等黃金為上白金為中赤金為下孟康云
赤金今丹陽銅也平準書又云虞夏之幣金為三品
或黃或白或赤正據此經為文舊傳說是

瑤琨篠簜 史記瑤琨竹箭 漢志琨作瑣 馬本同

王肅云瑤琨美石似玉者也 曾攷云禮記君洗
玉爵獻卿以瑤爵獻大夫周禮享先王贊玉爵后贊
瑤爵詩維玉及瑤知瑤者玉之次也

齒革羽毛 段玉裁云經本是旌字故孔傳訓旌牛尾
衛包妄攷作毛史記亦淺人妄攷

惟木 史記省此文漢志同 王引之云惟猶與也

蕞夷卉服 漢志蕞作鳥 阮元云史記揚州作蕞蓋

後人私改 段玉裁云正義引吳都賦蕞葛升越

于羅紉升乃竹字之誤竹可為布見王符潛夫論

汝綸案此與萊夷作牧皆母下為文蓋青州屨絲為
萊夷之筐此州織貝為鳥夷之筐耳鄭謂貢其草服
豈作牧亦貢物乎且冀州不貢何以有皮服也

厥筐織貝 史記厥作其下同 鄭云貝錦名也詩云

成是貝錦九織者先染其絲織之即成矣禮記曰士

不衣織

厥包桶柚錫貢 段玉裁云詩箋以果實相遺者必苞
苴之尙書曰厥苞桶柚佩觿譏鄭以草名之苞為厥
包據此知古皆作苞郭氏昧于六書假借耳 汝綸
案九江內錫大龜史記內錫作入賜賜錫皆與貢同
義說見後錫貢即貢也古人複語貢物即桶柚九包
皆貢物也荊州包匭菁茅亦三國所貢也

沿于江海達于淮泗 史記均江海通淮泗 鄭云均
讀曰沿沿順水行也 孫星衍云均蓋伯字三倉云

循古文徇 汝綸案史記漢書馬鄭本蓋皆作均而
鄭讀均為沿裴駰引鄭注不誤釋文謂鄭作松者陳
鄂竄改而誤耳

荆及衡陽惟荊州 鄭云荊州界自荆山南至衡山之
南

江漢朝宗于海 鄭云江水漢水其流遄疾又合為一
共赴海也 汝綸案宗亦朝也五經異義古周禮說
春日朝夏日宗秋日覲冬日遇許引書江漢朝宗于
海證之是朝宗猶朝覲也此與雍沮會同皆以朝會

之禮為譬況之詞下四海會同亦然鄭言江漢合一
與分為三孔之說不同者據北江言之漢志江至江
都入海亦以北江為正流也

九江孔殷

史記九江甚中

漢志廬江郡尋陽

東 蘄州

禹貢九江在南皆東合為大江

姚鼐云秦置九江

郡于今黃州安慶地其名蓋因殷周以來

汝綸案

史記平準書太史公曰余登廬山觀禹疏九江是史

公時禹蹟蓋猶未湮其云疏九江猶孟子之言疏九

河應劭云江自尋陽分為九者是也劉歆以為湖漢

九水彭蠡既是揚州且九水不得僭有江名宋儒謂在洞庭尤與秦漢舊說不合皆非是爾雅殷中也淮南主術注中正也言中則知九道皆自江分非山谿所出矣

泌潛既道 史記泌汾已道漢志潛作瀦 漢志南郡

枝江

縣今

江泌出西南

南字依水經注校增

東入江

馬云泌湖

也其中泉出而不流者謂之潛 鄭云爾雅釋水云

水自江出為泌漢別為汾今南郡枝江縣泌水其尾

入江耳首不于江出也華容

荊州東

有夏水首出江尾

入沔蓋此所謂沔也潛則未聞象類 汝綸案夏水
入沔沔之尾入江故鄭以為沔也馬以沔為湖蓋古
訓楚詞望沔陽兮極浦即沔水之陽也王逸注沔陽
江陵名附近郢此以江陵釋沔陽非釋沔也此州沔
潛疑與爾雅異

雲土夢作乂 史記雲夢土為治索隱作雲土夢夢一

作曹 漢志南郡華容荆州雲夢澤在南荆州數編南

有雲夢宮江夏郡西陵黃州有雲夢宮 徐邈雲作云

司馬貞云雲土夢二澤名 韋昭云雲土今為縣

屬江夏今按地理志江夏有雲杜縣是其地也 沈

括云舊尚書雲夢土太宗皇帝得古本作雲土夢詔
改從古本 汝綸案作雲土夢者是也據韋昭注則
古作雲土本澤名漢因為縣或省土稱雲故職方爾
雅司馬相如稱之為雲夢也說者不知雲土連文移
土于夢下則土為贖字矣

厥土惟塗泥厥田惟下中厥賦上下 史記其土塗泥

田下中賦上下

厥貢羽毛齒革惟金三品 史記貢羽旄齒革金三品

江聲云旌毛古字通

杮幹栝柏

說文幹作榦杮或作櫟

鄭云櫟榦栝柏

四木名榦栝榦栝柏葉松身曰栝顏師古云杮木似櫟而實汝綸案榦與干杆并同木名也爾雅棧木干木云干木猶上言桐木干即栝之異名廣雅杆栝也說者引弓人取榦釋之非其義矣杮即椿字春亦作芑莊子聖人愚芑以芑為椿與此以杮為椿正同抵即櫟字

礪砥磬丹

漢志礪作厲

鄭云厲磨刀石也精者曰

砥 顏師古云磬石名可以為矢鏃丹赤石也所謂
丹沙者也

惟箇籥栝 史記集解箇籥栝一作箭足杆 說文古

文籥从輅栝作枯云木名也 鄭云箇籥聆風也

徐廣云杆即栝也音怙箭足矢鏃也或以箭足訓釋
箇籥乎 孫星衍云長笛賦有聆風是竹別名 汝

綸案惟與也猶齒草羽旄惟木之惟徐以箭足為矢
鏃者釋名矢其本曰足又謂之鏃齊人謂之鏃其末
曰怙怙會也與絃會也是箭以鏃為足也矢鏃可以

竹木為之戰國趙策董安于之治晉陽公府之垣以
荻蒿苦楚廩之公發而試之其堅則箇簞之勁不能
過也左傳董澤之蒲可勝既乎此皆臨敵倉卒取為
箭材知不別傳金簇矣

三邦底貢 史記三國致貢 孔疏鄭以厥名下屬
汝綸案貢物即下苞茅

厥名包匭菁茅 史記厥作其下同 鄭云匭纏結也
菁茅茅有毛刺者給宗廟縮酒重之故包裹又纏結
也 段玉裁云匭讀為糾鄭于其音得其義也吳都

賦職貢納其苞匭

厥篚玄纁璣組 馬云組文也 孫星衍云璣或綦字

汝綸案孫讀璣為綦是也其引王會玄繚璧綦說之則非玄纁綦者三色也詩傳綦蒼艾色鄭顧命注青黑曰綦玉藻綦組綬注綦文雜色爾雅釋天注用綦組飾旒之邊所云綦組即此文之璣組也王伯申謂古之脂二部不相通據上澠溜其道史記其作既其在之部既在脂部詩如幾如式詩幾期也幾在脂部期在之部璣借為綦不足異也

九江納錫大龜 史記九江入賜大龜 惠棟云入古文內見南宮中鼎賜古文錫見儀禮注下賜土姓同汝綸案爾雅錫貢賜也是錫與貢同訓入賜者入貢也子貢名賜是賜有貢義也大龜鄭禮器注引作太龜褚少孫補電榮傳云神龜出於江水中廬江郡常歲時生龜長尺二寸者二十枚輸太卜官是九江貢龜至漢猶然也

潛漢 史記汾於漢 釋文本或作潛于漢孔疏同王樹枏云方言潛遊也後漢書馬援傳注遊猶浮也

荊河惟豫州 鄭云豫州界自荊山而北至于河

伊洛漣澗 史記洛作雒 漢志宏農郡盧氏今伊水縣

出東北入雒過郡一行四百五十里上雒商州禹貢雒

水出冢領山東北至鞏今縣入河過郡二行于七十里

豫州川河南郡穀成洛陽西北禹貢漣水出晉亭山柯劭忒依

續志補北東南至偃師今縣入雒宏農郡新安今縣禹貢澗

水在東南入雒

既入于河 史記于作於 舊傳四水合流而入河

滎波既豬 史記滎播既都 鄭云汎水溢出河為澤

也今塞為平地熒陽

榮澤河陰二縣

民猶謂其處為榮播在

其縣東春秋魯閔公二年衛侯及狄人戰于熒澤此

其地也 孔疏馬鄭王本皆作熒播 江聲云說文

潘水名在河南熒陽此經當作潘字潘播波三字同

段玉裁云左傳釋文熒本或作榮非

導荷澤被孟豬

史記道荷澤被明都

漢志濟陰郡

禹貢荷澤在定陶

今縣

東梁國睢陽

商邱

禹貢盟諸澤在

東北 汝綸案包論語注道治也下經西被于流沙

舊傳被及也後漢班彪傳注被猶及也此經導被猶

言導岍及岐治梁及岐也闕駟以為水盛乃覆被者
非是

厥土惟壤 史記其土壤 汝綸案釋文冀州引馬注
壤土性和美也

下土墳壚 鄭云壚䟽也 汝綸案舊傳兗州黑墳云
墳起也

厥田惟中上厥賦錯上中 史記田中上賦雜上中

厥貢漆枲絺紵厥篚織纊 史記貢漆絲絺紵其篚織

紵 汝綸案史記枲為絲者絲枲聲相近也江聲謂

當依史記作絲者非是楊雄州箴云煢播杲漆是經
字本作杲而史釋為絲也續作絮亦史訖

錫貢磬錯 汝綸案淮南汜論篇注磬石也磬錯者石
錯也詩他山之石可以為錯說為治磬之錯者非是
錫如內錫之錫亦貢也錫貢複語耳解見前上以篚
與貢類記故磬錯別言之與楊州橘柚荊州大龜文
同

華陽黑水惟梁州 鄭云梁州界自華山之南至于黑
水也

岷嶓既藝

史記汶嶓既藝

漢志蜀郡湔氏道

茂州東北

禹貢岷山在西徼外隴西郡西縣

秦州西

禹貢嶓冢山

在西 孫星衍云廣雅藝治也

沱潛既道

史記沱潛既道

漢志蜀郡郫縣

今禹貢縣

江沱在西東入大江汶江

茂州

江沱在西南東入江巴

郡宕渠

渠縣

瀾水西南入江漢中郡安陽

洋縣

驚谷水出

西南北入漢

鄭云二水亦謂自江漢出者地理志

在今蜀郡郫縣江沱及漢中安陽皆有沱水潛水其

尾入江漢耳首不於此出江原

崇陵

有鄰江首出江南

至犍為武陽

彭城縣東

又入江豈沔之類與潛蓋漢西出

岷冢東南至巴郡江州

巴縣

入江行二千七百六十里

漢別為潛其穴本小水積成澤流與漢合大禹自導

漢疏通即為西漢水也故書曰沔潛既道

劉逵云

有水從漢中沔陽縣

今沔縣

南流至梓潼

今漢壽縣

索即入

大穴中通岡山下西南潛出今名復水舊說云禹貢

潛水也

蔡蒙旅平

漢志蜀郡青衣

雅州府北

有禹貢蒙山

依史記集解校

增有字

鄭云地理志蔡蒙在漢嘉縣

漢順帝更名青衣為漢嘉

江聲云鄭以蔡蒙為一山 王引之云鄭郊特牲注
旅道也 汝綸案道治也旅平者治平也

和夷底績

漢志蜀郡禹貢桓水出蜀山

在保縣威州界

西南

行菴中入南海

鄭云和上夷所居之地也和讀曰

桓 惠棟云如淳漢書注陳留之俗言桓聲如和故

桓表或謂之和表東京賦叙和樹表

厥土青黎

史記其土青驪

馬云黎小䟽也

段玉

裁云黎離也合黎水經作合離

厥田惟下上厥賦下中三錯

史記田下上賦下中三

錯 舊傳賦第八雜出第七第九三等

厥貢璆鐵銀鏤斚磬 史記無厥字 馬本璆作鏐

鄭云黃金之美者謂之鏐鏐剛鐵可以鏤刻也 華

陽國志臺登縣今見山有斚石火燒成鐵剛利禹貢

厥貢斚是也

熊羆狐狸 胡渭云四獸之皮宜為裘小雅曰舟人之

子熊羆是裘豳風曰取彼狐狸為公子裘

織皮西傾因桓是來 漢志傾作頃來作徕 鄭云織

皮謂西戎之國也西傾雍州之山也雍我二野之間

人有事於京師者道常由此州而來桓是隴阪名其道盤桓旋曲而上故名曰桓是今其下民謂是阪曲為盤也 段玉裁云古是氏通用說文氏已蜀名山岸脅之堆旁著欲落墻者曰氏楊雄賦響若氏隴桓是即此氏字也漢書作阝隴師古阝音是亦作坻天水隴坻即鄭注之桓是也鄭云今其下民謂坂為是曲為桓也舉方俗語以證已說今本水經注譌謬不可讀 汝綸纂織皮蓋雕題勢面之屬織猶畫也鄭周禮注文織謂畫及繡錦詩織文鳥章亦謂畫文為

微幟也是織皮猶畫皮也又案王制西方之國被髮
衣皮鄭釋雍州織皮為衣皮之民據此則織當為縹
鄭周禮注縹縫中紉也哉从意省聲故織借為縹舊
傳謂織皮為縹為毛布非是因桓是者由桓氏也

浮于潛

段玉裁云史記本作潛今作潛者淺人所改

逾于沔

史記踰于沔

鄭云或謂漢為沔

漢志武

都郡

成都

東漢水受氏道水一名沔

孫星衍云志所

云氏道水即漾水也

入于渭

傳寅云浮潛以至漢上去沔為近故舍舟陸

行以入沔而沔之相通者有褒逾斜北達渭言入不言達者以褒斜之間絕水百餘里也

亂于河 舊傳正絕流曰亂 汝綸案亂于河則當由汾達都不言者汾在冀州非梁之域內且諸州貢道皆達河而止此云亂河則其達都已明雖不著泝汾可也

黑水西河惟雍州 鄭云雍州界自黑水而東至于西河

弱水既西 說文弱作溺 鄭云衆水皆東此水獨西

故記其西下也

涇屬渭汭

漢志隴西郡首陽

渭源

渭水所出東至船司

空

華陰

入河過郡四行千八百七十里雍州浸安定郡

涇陽

平原府西

开頭山在西禹貢涇水所出東南至陽滕

今縣西南

入渭過郡三行千六百里雍州川

鄭云涇水

渭水發源皆幾二千里然而涇小渭大属于渭以入

于河釋文汭本又作內

汝綸案作內者蓋鄭本說

文內入也鄭所謂属于渭以入於河也馬訓属為入

舊傳治涇入渭蓋用馬義與鄭異也鄭攷工記注属

讀為注涇屬渭內者涇注渭入也猶揚州言三江既入彼入為入海此入為入河古經簡奧有必應增字者此類是也若涇入渭而文曰屬渭汭則辭費矣內作汭者假借字說文汭水相入也孔疏引鄭云汭之言內乃詩箋語足見鄭此經不作汭也

漆沮既從 漢志右扶風漆州水在縣西北地郡直路

中部

沮水出東西

陳澧校改為西東

入洛歸德

靖

洛水出北

蠻夷中入河左馮翊懷德

富平

洛水東南入渭

汝

綸案闕駟以漆沮為一水詩傳有土漆沮猗與漆沮

皆以為二水據漢志漆在涇西沮在涇東此文漆沮
既從猶冀州恒衛既從當為二水

豐水攸同 史記豐水所同 漢志右扶風鄠今鄠縣豐水

出東南北過上林苑長安西南入渭 孫星衍云說文同

合會也

荆岐既旅 史記荆岐已旅 漢志左馮翊懷德富平禹

貢北條荆山在南右扶風美陽扶風禹貢岐山在西北

中水鄉 王引之云旅道也

終南惇物 史記終南敦物 漢志右扶風武功鄠縣太

壹山古文以為終南垂山古文以為敦物皆在縣東
有垂山祠

原隰底績 鄭云詩度其隰原即此原隰是也原隰豳

地

邠州三水

至于豬野 史記至于都野 漢志武威郡武威鎮休番

屠澤在東北古文以為猪野澤

三危既宅 史記三危既度 鄭云河圖及地說云三

危山在鳥鼠西南與岐山相連當岷山則在積石之

東南 水經禹貢山水澤地所在云三危在燉煌縣

縣今南

三苗不叙 史記三苗大序 汝綸案大序者大順也
厥土惟黃壤厥田惟上上厥賦中下 史記其土黃壤
田上上賦中下

厥貢惟球琳琅玕 史記貢璆琳琅玕 釋文琳一作
玲 鄭云球美玉也琳美石也琅玕珠也 孫星衍
云說文球或作璆

浮于積石 孔疏河行塞外東北入塞內積石非河之
源河所經也河從西來至此北流

至于龍門西河 漢志左馮翊夏陽城韓龍門山在北

會于渭汭 汝綸察廣雅會至也

織皮崑崙析支渠搜 史記崑崙作昆侖 馬云昆侖

在臨羌西寧府西西析在河關河州西 鄭云衣皮之民居

此昆侖析支渠搜三山之野者皆西戎也 釋文漢志

朔方郡有渠搜縣懷遠縣北武紀云北發渠搜是也

司馬貞云地理志金城郡臨羌有昆侖祠燉煌郡廣

至西安有昆侖障

西戎即叙 史記西戎即序 漢書西域傳贊云禹就

而序之非上威服致其實物

導岍及岐 史記此下道九山岍作汧 漢志右扶風

汧隴州吳山古文以為汧山雍州山 舊傳更理說所

治山川首尾 段玉裁云汧馬本作開開从汧聲古

音與汧同也

至于荆山 馬云道汧北條西傾中條嶓冢南條 舊

傳三山皆在雍州 孔疏地理志云禹貢北條荆山

南條荆山是舊有三條之說也馬融王肅皆為三
條鄭以為四列道汧為陰列西傾為次陰列嶓冢

為次陽列岷山為正陽列鄭創為此說也 柯劭忞
云祀三公山碑云三條別神白石神君碑云參三條
之壹三條為經師古義

逾于河 史記踰于河 舊傳此謂梁山龍門西河
孔疏逾于河謂山逾之也 汝綸案孔說是古以地
脈言山所云南條北條及山海經所載皆是也下入
于海即史記天官書所云中國山川東北流其維首
在隴蜀尾入于渤海也蔡傳謂禹逾河豈入海亦禹
赴海乎

雷首 漢志河東蒲反蒲州府 雷首山在南

至于太岳 史記至于太嶽 舊傳三山在冀州太岳

上黨西

底柱 史記砥柱 水經禹貢山水澤地所在云砥柱

山在河東太陽平陸縣東河中

析城至于王屋 漢志河東郡獲澤陽城禹貢析城山在

西南垣縣垣曲禹貢王屋山在東北 舊傳此三山在

冀州南河之北東行

太行 漢志河內郡山陽脩武東太行山在西北懷慶

府 太行山在西北

恒山 史記常山 漢志常山郡上曲陽曲陽恒山北谷

王念孫 改代谷 在西北有祠并州山

至于碣石入于海 舊傳此二山連延東北接碣石而

入滄海

西傾 漢志隴西郡臨洮洮州 禹貢西傾山在縣西

朱圉 漢志天水郡冀伏禹貢朱圉山在縣南梧中聚

為鼠 舊傳三者雍州之南山 汝綸纂漢志以為鼠

同穴為一山稱為鼠者省文也水經注引地說以為

鼠為同穴之枝幹則二山同體禹主名山川必不別立兩名且鳥鼠同穴四字分為二山均為不詞矣鄭從地說殊誤歸熙甫言都太僕常親至其山見鳥鼠來同穴此目驗而信者也

至于大華

漢志京兆華陰

縣

今大華山在南有祠豫州

山

舊傳相首尾而東

外方

漢志潁川郡密高

封登

武帝置以奉大室山是為

中岳有大室少室山廟古文以密高為外方山也

汝綸案馬云中條行渭洛涑淮蓋密高支麓接于成

舉為行沫也

至于陪尾 史記至于負尾 漢志江夏郡安陸

德安府

橫尾山在東北古文以為倍尾山 舊傳四山相連

東南在豫州界 顏師古云倍讀曰陪司馬貞云負

音陪 汝綸案自桐柏西至安陸于山脈為橫故曰

橫尾上與熊耳外方連延相屬水經注引地說有五

零陪尾在穀洛之南則亦熊耳支麓特其名為後起

耳賈公彥引春秋緯有泗水陪尾則與熊耳諸山脈

絡乖遠故古文不用其說若舊傳謂淮出桐柏經陪

尾則當別據一說今不可考矣

至于荆山

漢志南郡臨沮

南漳

禹貢南條荆山在東北

內方至于大別

漢志江夏郡竟陵

鍾祥

章山在東北古

文以為內方山六安國安豐

霍山

禹貢大別山在西南

汝綸案孔疏云地理志無大別鄭云大別在廬江

安豐今漢志有大別疑後人據鄭補之

岷山之陽

史記汶山之陽

至于衡山

漢志長沙國湘南

湘鄉

禹貢衡山在東南荆

州山

過九江 汝綸案衡山敷淺原均在江南不得言過九
江此承大別為文也中隔以岷衡二山者岷山接於
嶓冢而地脈盡于衡山是南條之駢枝也其分自嶓
冢起故因嶓冢而及之旁枝已了乃復接言正條故
過九江之文承大別言之謂南條正幹自大別過九
江而為敷淺原也史記叙世次多用此文法古尚書
所以說三條者為此自鄭君改為四列
九江者為衡山而地脈文勢兩失其解
別相屬其去衡山絕遠立文脈絡自明

至于敷淺原 史記集解淺一作滅 漢

陵德安傳陽山傳陽川在南古文以為傳

導弱水 史記此下道九川 釋文弱或

張掖郡刪丹山桑欽以為道弱水自此西至酒泉合

黎 汝綸案漢志臨羗有弱水昆侖山祠言有弱水

祠非水在臨羗也

至于合黎 漢志作合藜水經注作合離 鄭云地說

云合黎山在酒泉會水高臺縣東北

餘波入于流沙 漢志張掖郡居延甘州府治居延澤在東

裴駰引北古文以為流沙作西

導黑水至于三危入于南海 史記導作道 楚詞天

問黑水玄趾三危安在 鄭云地理志益州滇池貢

有黑水祠而不記此山水所在地記當作曰三危山

在鳥鼠之西南而南當岷山又在積石之西南當黑

水祠黑水出其南脇今中國無也 杜佑云道元注

水經銳意尋討亦不能知黑水所經之處年代久遠

今已湮涸也

導河積石 史記導作道 漢志金城郡河關河州積

石山在西南羌中河水行塞外東北入塞內至章武

滄州

入海過郡十六行九千四百里 西域傳蒲昌海

一名鹽澤

在關展西南

去玉門陽關三百餘里廣袤三百

里其水停居冬夏不增減皆以為潛行地下南出於積石為中國河云 馬云北條行河中條行渭洛沫淮南條行江漢

至于龍門

水經注北屈

吉州

故城西十里有風山風山

西四十里有孟門山淮南子曰龍門未闢呂梁未鑿河出孟門之上大溢於流名曰洪水大禹疏通謂之

孟門孟門即龍門之上口也此石經始禹鑿夾岸崇
溪其中崩浪縣流鼓若山騰迄于下口

南至于華陰 水經注河水自華陰潼關東北流

東至于砥柱 史記作砥柱 鄭云地說河水東流貫

砥柱觸闕流今世所謂砥柱者蓋乃闕流也砥柱當

在西河未詳也 水經注河水逕大陽

平陸縣故城東北

南又東過砥柱間砥柱山名也昔禹治洪水山陵當

水者鑿之故破山以通河三穿既決水流䟽分指狀

表目亦謂之三門矣山在虢城東北大陽城東也鄭

說非是西河當無山以擬之有砥柱以下五石以上
其間一百二十里河水竦石桀出軌連襄陸蓋亦鼎
鑿以通河疑此闕流也

又東至于孟津 史記作盟津薛綜云孟津四瀆之長

在洛北都道所湊古今以為津 水經河水過平縣

孟縣西北北注云河水至斯有盟津之目

東過洛汭 史記作雒汭 水經河水過鞏縣今北洛縣

水從縣西北流注之

至于大伾 史記作大伾 鄭云山一成曰伾地候也

沈出陜際矣然則大陜在河內脩武縣今武德陟武之界

涑沈之水與滎播澤出入自此 隋杜公瞻編珠引

春秋括地象云河有九曲發昆侖為地首至積石為地門出龍門為天橋至卷重山為地咽貫底柱觸闕流山為地喉至洛汭為地要至大伾山為地齒至大陸為地腹至碣石入于海為天臍 汝綸案鄭以大伾為地喉即據括地象為說疑砥柱闕流為地齒大伾為地喉杜所引誤倒耳當以鄭說正之

北過降水至于大陸 史記河渠書道河自積石歷龍

門南到華陰東下砥柱及孟津維汭至于大邳於是
禹以為河所從來者高水流悍難以行平地數為敗
乃廝二渠以引其河北載之高地過絳水至于大陸
播為九河同為迎河入于勃海 王橫云禹之行河

水本隨西山下東北去周譜定王五年河徙則今所

行非禹所穿也又秦攻魏決河灌其都決處遂大不

可復補宜卻從堯平處更開空使緣西山足乘高地

而東北入海 漢志魏郡鄴臨漳故大河在東北入海

上黨郡屯留今縣桑欽言絳水出西南東入海信都國

信都

冀州

故章河在北東入海禹貢絳水亦入海魏郡

館陶

今縣

河水別出為屯氏河東北至章武入海過郡

四行千五百里

鄭云今河所徙去大陸遠矣館陶

北屯氏河其故道與

水經注元城縣

今縣

北有沙邱

堰堰者障水也尚書禹貢曰北過降水不遵其道曰

降亦曰潰至於大陸北播為九河又云漳水逕屯留

縣東有絳水注之故桑欽云絳水出屯留西南東入

漳又云鄭以淇水為降水共城為降城所未詳也地

理志云絳水發源屯留下亂漳津是乃與漳俱得通

稱故水流間關所在著自信都復見絳名而東入于海尋其川脈無他殊瀆而衡漳舊道與屯氏相亂乃書有過降之文與地說千里之志即之途致與書相鄰河之過降當應此矣 汝綸案王橫所云西山杜佑謂太行恒山者是也漢志屯留絳水入海水經注作入漳酈謂漳絳俱得通稱則言漳不言絳言絳不言漳矣信都下禹貢絳水亦入海疑為酈下之脫簡其文當在故大河入海之下而誤移于信都故章河之下酈謂信都復見絳名蓋所見本已誤也志言大

陸在鉅鹿若禹貢絳水在信都是過大陸乃至降水
與經不相應鄭引地說過降水千里至大陸以駁漢
志謂鉅鹿與信都相去不容此數信都亦當是鄴之
誤字若志言絳在信都則鄭必據經文先後駁之不
但相去無千里矣今漢志及水經注蓋皆有譌誤也
志文信都故章河東入海疑亦入河之誤

又北播為九河 史記無又字 鄭云播散也 水經

注䟽潤下之勢以通河海及齊桓公霸世塞廣田居

同為一河故自堰

沙邱堰

以來館陶

今懷陶縣

甯貝邱平

高德州般德平廣川棗強信都冀州東光今縣河間今縣樂成

縣獻以東城地並存川濟多亾漢世河決金隄南北雁

其害議者常欲求九河故跡而穿之未知其所是以
班固云自茲距漢北亾八枝者也

同為逆河 鄭云下尾合名曰逆河言相逆受也 段

玉裁云夏本紀河渠本皆作迎河後人以所習改竄
河渠書又言東關洛瀉大邳迎河漢書溝洫志作迎
河

入于海 史記河渠書作入于勃海 汝綸案史以勃

海釋海臣瓚謂武帝元光二年河徙東郡更注勃海
禹時不注勃海入海乃在碣石其說非也碣石在勃
海故天官書云尾入于勃碣淮南天文篇賁星墜而
勃海決高誘注勃大也勃海即大海臣瓚以漢勃海
郡說之非是

嶓冢導漾東流為漢 史記嶓冢道漾 漢志隴西郡

西縣秦州禹貢嶓冢山西漢水所出南入廣漢白水今

在寧東南至江州巴縣入江過郡四行二千七百六十

里氏道西和禹貢漾水所出東王念孫至武都成縣

東北禹貢漾水所出東校增

漢武都郡武都

成縣

王念孫校刪

漢水受氏道水一名沔

過江夏謂之夏水入江沮縣沮水出東狼谷南至

沙羨

嘉魚

入江過郡五行四千里荊州川

常璩云漢

水有二源東源出武都氏道縣漾山為漾水禹貢導

漾東流為漢是也西源出隴西西縣嶓冢山會白水

逕葭萌

昭化

入漢始源曰沔

酈元云沔水無西入之

理劉澄之云有水從阿陽南至梓潼漢壽

昭化

入大

穴暗通岡山郭景純亦言是矣岡山穴小本不容水

水成大澤而流與漢合故諸言漢水者多言西漢至

葭萌入漢 汝綸案說文漾古文作養水經注沔水

一名沮水又案蔡傳蟠冢山地志云在隴西氏道縣

漾水所出又云在西縣是蔡所見漢志本氏道下禹

貢養水所出上有蟠冢山三字今本脫誤耳蔡據漢

志氏道西縣并有蟠冢山故云一山跨兩縣其說是

也水經漾水篇及禹貢山水澤地所在并云蟠冢山

在隴西氏道縣郭璞山海經注亦云蟠冢今在武都

氏道縣南氏道蟠冢即常璩所云漾山近儒據誤本

漢志并謂氏道無蟠冢非也闕駟謂洋

今水經注誤作漾依下文

及淮南水出崑崙西北隅至氏道重源顯發而為漾

于校改

水酈引穆天子傳庚辰濟于泮水證之余考淮南地

形篇河水出昆侖東北陬泮水出其西北陬高誘注

泮水經隴西氏道東至武都為漢與闕說同闕又言

漾水出潁道

鞏目北

與許慎呂忱合自昆侖至潁道蓋

皆漾之上源酈元非之亦誤潁道以上本一川二漢
之分自嶓冢始酈引漢中記云嶓冢以東水皆東流
嶓冢以西水皆西流二漢分行嶓冢東西皆為禹貢
之漾故班志以東漢為漾水水經以西漢為漾水班

于西縣云西漢水者廣異名耳不謂西漢非漾也經
言東流為漢亦合二川言之漢志東漢水受氏道水
至武都為漢水經注武都沮縣陽之沮水瀆西南注
于濁水南逕槃頭郡陽東又東注于漢水是東漢
水之東流者也常璩云西漢逕葭萌入漢劉郭所謂
岡穴暗通者是西漢水之東流者也二川上源本合
下流又合其分而東西皆禹貢之漾其合則皆禹貢
所云東流為漢故鄭以西漢為潛而酈元謂東西二
源俱出蟠冢同為漢水也班志西漢至江州入江

特其下委之岐出至後世乃盛禹時未必然也近儒以今水道言之謂東漢水不受氏道水西漢水不入東漢水乃盡弃漢魏舊說創為新論謂漢志水經并為謬誤可謂敢于自信矣

又東為滄浪之水 史記滄作蒼 水經注云禹貢又東為滄浪之水不言過而言為者明非他水決入也蓋漢沔水自下有滄浪通稱爾

過三澨

水經三澨即縣

宜城

北池

汝綸案鄭以滄浪

為夏水夏水自雲杜入沔故言三澨在竟陵

天門酈元

謂滄浪為沔漢通稱不由夏水決入則宜以在郢縣
者為是酈又云池流多矣論者疑焉余謂池沔同字
馬注荊州沔云沔湖也然則郢縣北池即郢縣北湖
耳郢縣北古有湖故水經注襄陽有三洲司馬懿攻
朱然于三洲口洲即湖中可居之地也水經注又言
襄陽湖水上承鴈湖東南流注白馬陂又蔡洲對岸
有洞湖三潏蓋是此三湖矣

至于大別 鄭云大別在廬江安豐縣 王鳴盛云安
豐在今霍山縣水經注雩婁在安豐西南大別在雩

婁南則英山麻城羅田諸縣山勢連延西南趨江漢
水東北迤行挿入其境故地說言漢水觸大別之陂
陂者山脈之靡迤不盡者耳非水直至山下也 汝
綸案孔疏云地理志無大別鄭云大別在廬江安豐
縣據此則謂大別在安豐者乃鄭說非班志今本漢
志安豐下云禹貢大別山在西南者乃後人據鄭說
補之非班氏本文也孔疏又引杜預解春秋云大別
闕不知何處或曰大別在安豐縣西南二別近漢之
名無緣得在安豐杜言或曰不以為地理志水經注

引京相璠春秋土地名曰大別在安豐縣南亦不引地理志均漢志無大別之證今人孰誤本漢志反言孔氏失檢安豐去漢絕遠乃迂迴說之此其失也荆山內方大別皆漢西之山若安豐則在漢東矣漢山文安得不言逾漢邪

南入于江 水經注庾仲雍曰夏口一曰沔口矣

在漢陽

東滙澤為彭蠡 鄭云滙回也漢與江鬥轉東成其澤矣

東為北江 吳澄云漢江相配與他小水入大水不同

江之入海非獨江水實兼漢水江固為江漢亦為江

也故漢得分江之名而為北江 錢塘云漢源于北

故以北江屬之江源於南故以中江南江屬之 汝

綸案水經沔水篇著北江南江之分流其文奪誤自

酈氏已譏議之今為考正如左 沔水與江合流又

東過彭蠡澤 此下舊云又東北出居巢南 又東至石城

縣分為二其一東北流 此下舊云其一又過毗陵縣

清于此移 又東北出居巢縣南又東過牛渚縣南 阮

其一於後 謂牛渚見越絕書即史記秦始皇本紀所云海渚張

守節以為在同安者余謂越絕書云度牛渚奏東安

東安今富春漢富春在會稽郡不足定牛渚之在又同安也水經牛渚在居巢縣東蓋即今牛渚耳

過毗陵縣北為北江此下舊云又東其一此二字舊

陵上今移於此此又東至會稽餘姚縣東入於海

入于海 漢志臨淮郡海陵州通有江海會祠 汝綸案

北江入海在海陵志言江都毗陵則近海之南北岸

耳

岷山導江 史記汶山道江 漢志成都郡蒯氏道州茂

東禹貢嶠山在西徼外江水所出東南至江都縣今入

海過郡七說文繫行二說文繫千六百六十里 孫

星衍云說文嵒山嵒岷即嵒省字楚詞作汶汶借字也

東別為沱

漢志江原

崇慶

鄽水首受江南至武陽

彭城入

江汝綸案鄽以鄽江為沱蓋是也漢志汶江之沱水經以為開明所鑿郫縣之沱則李冰所開鄽謂其首不受江皆據未穿時言之故與後不同也其荊州之沱當依馬注為胡鄽謂為夏水疑非也

又東至于澧

史記澧作醴

漢志武陵郡充縣

桑植麻

山澧水所出東至下隲

巴陵

入沅過郡二行一千二百

里 司馬貞云騷人所歌濯余佩於醴浦明醴是水名虞喜志林以醴是江沅之別流而醴字作澧也

汝綸案水經江水東至長沙下隽縣北澧水沅水資水合東流注之湘水從南來注之酈元謂澧沅資皆注於洞庭之陂是乃湘水非江川然澧水沅水篇并云東至長沙下隽縣西北東入於江資水篇云東與沅水合于湖中東北入于江皆言入江不言入湘湘水篇注湘水左會資水世謂之益陽江然則湘沅資均與澧合自下互受通稱經云至于澧者以澧為經

沅實兼湘沅資諸水其入江之處則酈云江水右會
湘水所謂江水會者是也澧入洞庭不入江言江至
者洞庭為此諸水所豬非別是一水故過湖入江乃
為澧之下尾也馬以醴為水名蓋古文家舊說鄭改
為陵名以經言至于者皆不為水余謂澧陵既非江
水所經下沅水至于沔亦是水名鄭義非也

過九江 汝綸案孔疏九江之水禹前已有其處非也
淮南要畧篇禹身執殛垂剗河而道九歧鑿江而分
九路則九江明是禹鑿非在禹前漢志九江在尋陽

南既有定處則可謂之過文與過三蒞正同

至于東陵 漢志廬江郡故淮南文帝十六年別為國
金蘭西北有東陵鄉淮水出屬揚州廬江出陵陽東
南北入江 水經江水過下雉縣北利水從東陵西
南注之酈注青林湖水出廬江郡之東陵鄉江夏有
西陵縣故是言東矣尙書云江水過九江至于東陵
者也西南流水積為湖湖水西流謂之青林水又西
南歷尋陽分為二水一水東流通大雷一水西南流
注于江經所云利水也右對馬頭岸又決水篇注云

灌水道源廬江金蘭縣西北東陵鄉大蘇山褚先生
所謂神龜出於江灌之間嘉林之中蓋謂此水也東
北逕蓼縣固始故城西而北注決水姚鼐云漢武帝

以前廬江郡在今江西及池州地故志云廬江出陵

陽

石埭

東南北入江東陵鄉謂今池州山也金蘭疑石

城之舊名禹南江經貴池青陽南陵而東迤行山隘
中故曰東迤汝綸案姚據廬江王賜都江南與越
交通及伍被謀擊廬江絕豫章之口思得江南以通
越定漢初廬江在江南最為有據山海經浙江出三

天子都入海餘暨南廬江出三天子都入江彭澤西
尤廬江在江南之證漢志丹陽郡陵陽桑欽言淮水
出東南北入大江蓋即東陵鄉所出之淮水也陵陽
為縣蓋以在東陵之陽而得名歟東陵鄉以東陵得
名東陵不必即在其鄉蓋南江初分東陵當其處故
曰至于東陵東迤也如水經注之言則東陵在江北
其南則利水所出其北則灌水所出當在今英霍之
交去江甚遠矣班時廬江已在江北而記陵陽東陵
鄉之水皆追紀前事故附著郡下而不著金蘭縣于

郡所屬中明非作志時郡中之水改淮為灌者非是
灌自見雩婁縣也

東池

漢志丹陽郡石城

建德

分江水首受江東至餘姚

今

入海過郡二行千二百里會稽郡吳

今縣

南江在南

東入海揚州川

說文池表行也

鄭云東池者為

南江

汝綸案鄭云三江分于彭蠡近儒以漢志石

城為今貴池貴池距彭蠡數百里故知非也元和郡

縣志池州本漢鄣郡之域吳于此置石城縣又云至

德縣本漢石城至德今建德據此則吳石城在貴池

漢石城在建德建德與彭澤接境石城首受江即分
于彭蠡也不言首受彭蠡者彭蠡之水即江水沅湘
皆入洞庭志言入江亦此例也水經注南江逕臨城
陽青安吳縣寧國縣今故鄣廣安吉縣今注于具區此諸縣
各有山界隔之水不能越山而東姚氏謂迤行山隘
中是也其至餘姚入海則說文所云江水東至會稽
山陰為浙江者也

北會于滙 姚鼐云導江至東陵其分而東流者迤邐
入海是南江也其北流者又會于滙而後為中江也

汝綸案至于東陵東池已括南江原委其北會則
屬中江為文水經沔水與江合流東北出居巢縣南
故姚說滙為巢湖然謂湖澤為滙於古無徵舊說為
彭蠡者牽上滙澤為彭蠡而妄說之然鄭訓滙為回
則不得為彭蠡之名矣阮太傅以滙為震澤震澤名
見于經此何以更名為滙滙者淮之借字唐扶頌匪
夷來降以匪為淮史記南越傳江淮以南樓船十萬
師徐廣曰淮一作滙又伏波將軍下滙水徐廣云滙
或作淮皆其證淮即出陵陽東南北入江者是也今

謂之清弋江源出石埭至魯港入江江會此水乃至
蕪湖而分為中江鄭云三江分於彭蠡為三孔者言
江之分自彭蠡始非三孔并在彭蠡班志分江水在
石城中江出無湖水經亦言江至石城縣分為二不
言分為三自彭蠡以東山勢鬱盤亦不容有三流并
出之道故中江必至無湖始可分而以北會于淮括
彭蠡至無湖之濱也淮在江南言北會者對東也立
文亦其地勢北趨也姚氏以北為北流者其讀北一
字為句會于淮三字為句義尤明顯不言北岸之水

者經以北江屬道濊也若如阮讀為南江北會震澤下接中江入海之文則南江無尾中江無首非屬辭之理矣鄭謂東迤者為南江不謂北會于滙者為南江也

東為中江 舊傳有北有中南可知 姚鼐云江漢既合為北江者非必漢水為中江者非必江水也約其地勢南北而概分之以明江漢之均為瀆耳

入于海 阮元云班志叙北江止于毗陵中江止于陽羨者太湖以東今太倉松江海門及江北通州漢皆

不置縣為海潮之所往來也班于吳曰南江在南於
毗陵曰北江在北則中江必在吳北毗陵南李善引
水經注中江東南左會漏湖漏湖在常州府西南當
太湖北正漢陽羨地由漏湖東出必松江也吳松江
口正中江入海之處也

導沔水東流為濟入于河溢為滎 史記道沔水東為

濟入于河洙為滎 漢志河東郡垣垣曲王屋山在東

沔水所出東南至武德武入河軼出滎陽今北地中

又東至琅槐樂安入海過郡九行千八百四十里

東出于陶丘北 史記無于字 漢志齊陰郡定陶今縣

禹貢陶丘在西南

鄭作西北

陶丘亭

說文出作至

汝

綸案出猶至耳漢志水經滎澤以下沛瀆通流或據
出字為義謂禹時滎澤滂而不流越五百里而沛復
出于陶丘此臆說也職方豫州其川滎雒滎即沛瀆
也

又東至于荷 史記荷作荷 汝綸案漢志荷在湖陵

湖陵地勢南下不得北會汶水舊傳以為荷澤之水
酈元謂荷澤即沛水所包注以成湖澤者若荷是荷

澤當如雁為彭蠡溢為滎之類不得言至于也水經
注沛水逕定陶故城南又東北右合蒗水乃此經至
蒗之說也蒗澤漢志在定陶東此蒗水酈云上承沛
水于沛陽縣東沛陽今蘭儀在定陶西且二百里非
蒗澤之水矣

又東北會于汶

漢志泰山萊蕪

今縣

禹貢汶水出西南

入沛

水經沛水東北過壽張

東平縣

西界安民亭

安山鎮

南汶水從東來注之

又北東

史記又東北

入于海 山海經濟水注勃海入齊琅槐樂安東北 黃

儀云今小清河所經自厯城以東皆古泲水所行大

清河自厯城以上皆泲水故道自厯城東北則古漯

水所行蒲台以北則故河水所經蓋宋時河嘗行漯

瀆及河徙則大清河兼行河漯二瀆小清河行泲水故道

也

導淮自桐柏 史記導作道 漢志南陽郡平氏桐柏禹

貢桐柏大復山在東南淮水所出東南至淮陵依王鳴盛

校改淮浦入海過郡四行三千二百四十里青州川

金履祥云九

一千七百里

東會于泗沂 漢志泰山郡益沂水南至下邳州入

泗沛陰郡乘氏鉅野泗水東至睢陵當依水經注作淮陰今清河入

淮魯國卞泗水泗水西南至方與魚臺入沛 酈元云乘

氏泗水乃蒗澤也澤水淼漫俱鍾淮泗故志有睢陵

入淮之言以通苞泗名矣或更有泗水亦可是水之

兼其目所未詳也 汝綸察水經沛水東過方與縣

北為蒗水又東過湖陸縣南東入于泗水乘氏無蒗

泗之目乃沛水之東南流者所過耳漢志泗水當為

沛水之誤酈謂沛水南流者為沛水經則方與以上
不名沛也酈引漢志睢陵入淮睢陵亦當為淮陰之
誤淮水篇云淮水至下邳淮陰縣西泗水從西北來
注之是也

東入于海 水經淮水東至廣陵淮浦縣安東縣西入于海

導渭自鳥鼠同穴 史記導作道 漢志隴西郡首陽

渭源禹貢鳥鼠同穴山在西南渭水所出東至船司空

華陰入河過郡四行千八百七十里雍州寧

東會于澧 水經注地說云渭水與豐水會于短陰山

胡渭云元和志咸陽縣渭水南去縣三里短陰原在縣西南二十里

又東會于涇 水經渭水逕平阿侯王譚墓在今高陵北左則涇水注焉

又東過漆沮 舊傳漆沮一水名亦曰洛水出馮翊北水經注渭水過華陰今縣北洛水入焉闕駟以為

漆沮之水也 孔疏漆沮在涇水之東故孔以為洛水一名漆沮水經沮水出北地直路縣中東入洛水

又云鄭渠在太上皇陵東南濯水入焉俗謂之漆水

又謂之漆沮其水東流注于洛水以水土驗之與毛詩古公自土沮漆者別也彼漆即扶風漆水也彼沮則未聞汝綸案漢志涇西無沮涇東無漆闕駟以

洛水為漆沮之水本舊傳為說說文漆水出右扶風

杜陽

今本作陵誤依水經注引校改杜陽今麟遊縣

岐山東入渭一曰入洛

漆之入洛蓋禹時故跡元和郡縣志云邠州理即漢

漆縣漆水西北流

疑當作東南流寰宇記云新平縣有白土川水東北流或是漢漆水

注于涇是漆之上源自涇西而入涇也水經注鄭渠首上承涇水于中山西邸瓠口為渠竝北山東注洛

三百餘里渠雖鄭國所開亦必依循川絡疑鄭渠所
經卽漆水自涇入洛之故道故酈氏時俗猶曰鄭渠
東南出之濁水為漆水也禹時漆水絕涇而東以合
于洛漢時漆水入渭故說文兩載入渭入洛之文洛
水兼受漆沮二水斯得漆沮通稱矣以漆沮為一水
者非也

入于河 水經注春秋之渭汭也水會卽船司空華所陰
在矣

導洛自熊耳 史記道雒自熊耳 漢志宏農郡盧氏

今熊耳山在東上雒商州禹貢雒水出冢領山東北至

鞏縣今入河過郡二行千七百里豫州川熊耳獲輿山

在東北 孫星衍云山海經謹舉之山洛水出焉謹

舉即獲輿之異名聲相近上洛熊耳即盧氏山也

東北會于澗瀍 舊傳會于河南城南 水經洛水過

河南縣南酈注引地記云洛水東北過五零陪尾北

與澗瀍合是二水東入千金渠故瀆存焉又云山海

經白石之山在新安澗水出焉北流注于穀自下澗穀

兼稱故尚書無穀水之目河南王城西北穀水之右

有石磧磧南出為死穀韋昭曰洛水在王城南穀水
在王城北東入於瀍至靈王時穀水盛出于王城西
而南流合于洛水毀王城西南也又云穀城縣洛陽西北
北有潛亭西征賦所謂越街郵者也瀍水又東南派
注于穀汝綸案瀍瀍皆合于穀水穀水舊至王城
東入雒水經瀍水與千金渠合過偃師入洛者千金
渠之下尾非穀水故道也

又東會于伊 舊傳會于洛陽之南 水經洛水過洛

陽縣

今縣東北

伊水從西來注之

又東北入于河 史記無又字 水經注山海經曰洛

水成皋

鞏縣東

西入河謂之洛汭即什谷張儀說秦塞

什谷之口者也

九州攸同 史記於是九州攸同 汝綸案此下摠叙

水土之平故史以於是釋之

四隩既宅 史記四隩既居 汝綸案說文壩四方土

可居也是釋此經四壩既宅之文非為壩作詁疑說

文本引此經而今本脫之廣韻四壩四方土即用說

文舊訓

九山刊旅 史記九山栲旅 汝綸案栲木史記作表
木鄭郊特牲注旅道也栲旅者表道也韋昭所云列
樹以表道者也

九川滌源 史記九川滌原 汝綸案一切經音義滌
古文澗同澗即斥字如淳漢書惠紀注斥開也漢志
源作原與史記同源俗字滌原者開源故河渠書云
九川既疏也

九澤既陂 汝綸案河渠書作九澤既灑周書大匡篇
賦灑其幣孔晁注灑散也河渠書禹脩二渠漢書作

灑二渠相如文灑沱澹災灑沈即此灑九澤之義謂
散沈也此經破為披之借字方言披散也

六府孔修 史記六府甚修 舊傳水火金木土穀甚
修治 孫星衍云高誘淮南注修治也

庶土交正 史記衆土交正 汝綸案詩傳土居也衆
居交正即湯誥所云四瀆已脩万民乃有居者是也
底慎財賦 史記致慎財賦 汝綸案廣雅慎慎也漢
書音義貢合作心旁貢是貢慎通借致慎者致貢也
咸則三壤成賦 鄭云三壤上中下各三等也 汝綸

案王昶素問注則準也約也此結上事中邦錫土姓者目下五服也

中邦錫土姓 史記中國賜土姓 鄭云中即九州也
天子建其國諸侯祚之土賜之姓命之氏 舊傳天
子建德因生以賜姓謂有德之人生此地以此地名
賜之姓以顯之 金履祥云水土既平田制既定於
是修封建之法

祇台德先不距朕行 汝綸案祇振同字詩傳振自也
爾雅台朕我也我者我天子也荀子脩身篇以善先

人者謂之教楊倞注先首唱也相如文父兄之教不
先與此先同鄭以距為距違後漢馬援傳旅距李賢
注不從之兒是距為違也爾雅行道也言自我德首
倡天下皆不違我道也

五百里甸服 史記令天子之國以外五百里甸服

孔疏鄭王制注服治田出穀稅也 汝綸案九州萬

里五服五千里明五服不能盡九州五服之外有四
海並在九州之內爾雅夷狄戎蠻為四海而冀州揚
州有島夷青州有蜺夷萊夷徐州有淮夷梁州有和

夷織皮雍州有四戎皆九州兼苞四海之證

百里賦納總二百里納銍三百里納結服 漢志結作

戛 鄭本納作入結作𦵏云入總入刈禾也銍斷去

藁也結又去穎也禮器注引納𦵏服不作入 焦循

云服孔傳訓藁役即毛詩禾役傳訓為列列即梨如

荼之茹以禾穗言之呂覽嘗時篇得時之麥稂長而

頸黑二七以為行而服薄糕而赤色程瑤田以此服

即結服也

四百里粟五百里米 孫星衍云說文粟嘉穀實也米

栗實也

五百里侯服

史記甸服外五百里侯服

舊傳侯侯

也

百里采

馬云采事也各受王事者

汝綸案郭爾雅

注宮地曰采

二百里男邦

史記二百里任國

惠棟云古男與南

通白虎通南之為言任也

三百里諸侯

朱子云三百里謂自二至五為百里者

三隨文生例不可拘也

五百里綬服 史記侯服外五百里綬服 舊傳綬安也 孔疏周語侯衛賓服彼賓服當此綬服韋昭云以文武教衛為安王賓之因以名服

三百里揆文教 汝綸案太立立數篇范望注癸取其

揆然何萌芽也太立有子雲自為章句詭猶及見之

見范序此揆然乃古義當是章句中語據此則揆與奮

義相近也訓揆為度者非字通作駮廣雅駮駮威也

二百里奮武衛 孔疏內文而外武 汝綸案衛謂軒

衛猶詩之言干城也

五百里要服 史記緩服外五百里要服 汝綸案要
幽一聲之轉幽荒對文皆言遠也爾雅燕曰幽州李
巡注燕其氣溪要厥性剽疾故曰幽幽要也是要幽
同義李云溪要即溪幽也

三百里夷 王安石云於此皆夷也夷易也無中國禮
法易而已蠻慢也甚於夷矣

二百里蔡 蔡傳蔡放也左傳蔡蔡叔是也蔡與流皆
所以處罪人

五百里荒服 史記要服外五百里荒服 汝綸案五

經異義以五服方五千里為今文說以五服相距万里為古尚書說非也史記乃古文說蓋歐陽夏侯自同史記而賈馬乃為異解非史公所問之故也每二百三百里明白五百里分言之鄭謂每服之外殊誤王肅駁賈馬鄭而依史記其說甚辨

三百里蠻 鄭云蠻者聽從其俗羈縻其人耳故云蠻蠻之言緡也

東漸于海西被于流沙 舊傳漸入也被及也 汝綸案漢書董仲舒傳注漸浸潤之也

朔南暨聲教 孫星衍云漢書賈捐之傳云以三聖之
德地方不過數千里西被流沙東漸于海朔南暨聲
教迄于四海欲與聲教則治之不欲與者不彊治也
是訓暨為與與讀為豫 汝綸案東漸以下十四字
急氣讀之乃得朔南與東西為儼東西各以漸海被
流沙為言朔南無文古人文句參差也暨聲教蒙上
東西朔南言之非專承朔南也舊傳皆與王者聲教
釋文與音韻亦訓暨為與及之與

訖于四海 汝綸案漢書王莽傳迄于四表顏師古注

迄竟也

禹錫立圭告厥成功 史記於是帝錫禹立圭以告成
功于天下天下於是大平治

甘誓

史記禹子啓賢天下屬意焉及禹崩雖授益益之佐
禹曰淺天下未洽故諸侯皆去益而朝啓曰吾君帝
禹之子也於是啓遂即天子之位是為夏后帝啓夏
后帝啓禹之子其母塗山氏之女也有扈氏不服啓
伐之大戰于甘將戰作甘誓乃召其卿士之 高誘

淮南注云有扈夏啓之庶兄也以堯舜舉賢禹獨與
子故伐啓啓亡之 汝綸案楚語觀射父曰堯有丹
朱舜有商均夏有觀扈周有管蔡高以扈為啓庶兄
蓋是古說然非史記義也

大戰于甘 大傳戰者憚驚之也 馬云甘有扈南郊
地名甘水名今在鄆縣西

乃召六卿 史記將戰作甘誓乃召六卿申之

王曰嗟 史記啓曰嗟

六事之人 金履祥云六卿為六事猶大夫為三事也

汝綸案說文事職也鄭大傳注夏六卿后稷司徒秩宗司馬作士共工也

予誓告汝 史記汝作女 汝綸案爾雅釋言誓謹也蔡邕獨斷告教也誓告女者謹教女也是後誓詰之書因此文為名荀子云誥誓不及五帝前未有也

有扈氏 漢志右扶風鄠縣今古國有戶 依史記谷甘今

脫甘依說文增 亭扈夏啓所伐 張守節云訓纂云戶扈鄠

三字一也古今字不同耳

威侮五行怠棄三正 鄭云威侮暴逆之 汝綸案鄭

以暴訓威者後漢杜詩傳注威虐也以逆訓侮者說苑權謀篇侮上者所之道也五行謂五教也行如周禮六行之行三正謂三禮也正政同字如洪範八政之政 柯劭忞云逸周書史記解屬氏弱而不恭身死國亡怠奔弱也威侮不恭也正釋此經之誼

天用勦絕其命 說文作剋絕 廣雅釋言剋天也

汝綸案勦當為勦形近而譌勦者剋之異字馬本作巢勦之省文漢書外戚傳命攔絕而不長攔又勦之假音字也

今予惟恭行天之罰 史記惟恭作維共下恭命并同
舊傳恭奉也 汝綸案此借恭為共也無極山碑
增益吏役恭君下職惟宜也

左不攻于左 墨子攻作共下攻右同 國志毛玠傳
引書亦作共 汝綸案此借攻為共也

右不攻于右 鄭云左車左右車右

御非其馬之正 史記正作政墨子同 段玉裁云小
雅出車箋御夫則茲益懞悻憂其馬之政此用甘誓
語也 汝綸案鄭文王世子注正者政也此申六卿

之詞言軍吏有不共者皆女不共命也

用命賞于祖弗用命戮于社 史記戮作僇 墨子賞

于祖者何也告分之均也僇于社者何也告聽之中

也祖者廟主社者社主 摯虞決疑要注云古者帝

王出征伐以齊車載遷廟之主及社主以行 汝綸

案封禪書禹興而脩社祀

予則孥戮汝 史記作帑僇 鄭司農周禮注引作奴

僇 鄭湯誓注云大罪不止其身又帑僇其子孫

汝綸案帑僇二鄭異解季布為朱家鉗奴而漢書亦

傳贊云奴僇苟活疑夏侯歐陽書作奴僇班據為說也史記作帑左傳秦人歸其帑商君法坐事未利及怠而貧者舉以為收帑則鄭說帑僇子孫者是也罪人不帑乃文王之仁政不謂古無帑僇父子兄弟罪不相及常刑然耳非軍法也商君之慘刻乃施重刑于輕罪非收帑自商君始也方行軍誓眾但以奴僇之何足儆眾邪 史記遂戒有扈氏天下咸朝